

續通鑑綱目



宋 高宗

漢書門			
二	一	二	二
八	八	一	一
冊	架	函	號

庫文閣内			
三		二	漢
函		一	書
六	二	八	
架	冊	號	類

内閣文庫			
番號	漢	2187	
冊數	28(14)		
函號	284	6	

十四



綴じ部(喉部分)の文字など開きが不鮮明な箇所あり

續資治通鑑綱目卷之十四

淺草文庫

起戊午宋高宗紹興八年盡乙丑宋高宗紹興十五年

凡八年

戊午年
八年
金天眷元年

春正月張守罷

帝議還臨安張守言建康自六朝為帝王都氣象雄偉且據都會以經理中原依險阻以捍禦疆敵陛下席未及暖今又巡幸百司六軍有勤動之苦民力邦用有頓費之憂願少安于此以繫中原民心趙鼎不可守遂求去出知婺州

廣義

異哉趙鼎之見也向嘗建策以為越不可都當都荆襄高宗既無意於荆

襲則建康不猶愈於臨安乎昔人有言寧
飲建鄴水不食武昌魚寧還建鄴死不到
武昌居鼎於是時贊成張守之言不亦美
乎今乃曰不可則鼎之聰明不及於前矣
宜乎屢見斥於其君也

二月胡安國進春秋傳詔加安國賢文閣直學

士

自王安石廢春秋不列於學官安國謂先聖
手所筆削之書天下事物無不備於此乃傳
心之要典也而人主不得聞講說學士不
相傳習亂倫滅理用夷變夏殆由乎此

心二十餘年著春秋傳以成其志至是止之
帝謂深得聖人之旨詔進一官命未下而卒
賜謚文定安國彊學力行以聖人爲標的志
於康濟斯民見中原淪沒遺黎塗炭常若痛
切其身雖數以罪去愛君憂國遠而彌篤風
度凝遠視天下萬物無一足嬰其心自渡江
以來儒者進退合義以安國尹焞爲稱首謝
良佐嘗語人曰胡康侯如大冬嚴雪百草萎
死而松柏挺然獨秀者也

發明

春秋孔子之刑書示百王之大法寓
褒貶之至公苟非發明其顯微何以
闡揚其奧旨左氏有傳泛而不切穀梁有
傳直而不精皆未足以發明之也安國潛

心二十餘年，作為本傳，其間微顯闡幽，提綱挈目，誠有益於治天下國家之良規也。所謂尊君父、討亂賊、闢邪說、正人心、用夏變夷、大法畧具。庶幾聖王經世之志，小有補云之意耳。雖然，安國春秋之傳，蓋為高宗而作也。使其讀此，能知大義，渙起復讐之志，恢弘攘狄之心，詎可比面而事虜哉！惜其蔽固已深，終莫能悟也。綱目書此，蓋深美之。

廣義

康侯之傳春秋，實吾夫子之家相也。王安石之叛經，是得罪於聖門者也。得罪於聖門，乃得罪於天下後世者也。康侯相吾夫子，是有功於聖門，有功於天下。

後世者也。由是觀之，則其人之賢，不肖何如耶。噫，康侯之道，雖不得行於當時，然後世學者讀其書，則可以見其人之剛正。道行於萬世也，豈博當時之一官哉！

帝定都臨安

帝自建康至臨安，自是始定都矣。一日，內侍移竹栽入內，趙鼎見之，責曰：「良嶽花石之擾，皆出汝曹。今欲蹈前轍邪？」因奏其事。帝改容謝之。又有戶部官進錢入宮者，鼎召至相府，切責之。翌日，問帝曰：「其人獻錢耶？」帝曰：「朕求之也。」鼎曰：「其人不當獻，陛下不當求。」遂黜其人於遠郡。

發明

嗚呼高宗至是誠無意於中原矣苟有志於中原者不都川陝則都荆襄不都建康則都維揚今而定都杭州僻處海角則栖栖然苟安之意見矣蓋起於西北然後可以控制東南起於東南則非可以恢復西北况臨安僻在一隅初非用武之地諸葛武侯曰漢賊不兩立王業不偏安高宗寧忍棄祖宗之土地忘父母之仇讐而偷安於一時也耶直書定都不再貶而其義自見

三月以劉大中參知政事王夔為樞密副使○

以秦檜為尚書右僕射同平章事兼樞密使

初張浚嘗與趙鼎論人才浚極稱檜善鼎曰此人得志吾輩無所措足矣及鼎再相檜在樞密一惟鼎言是從鼎由是深信之言檜可大任於帝而不知為檜所賣也檜既相制下朝士相賀獨吏部侍郎晏敦復有憂色曰姦人相矣聞者皆以其言為過

發明

臣嘗感世道盛衰之由觀小人進退之萌駸駸而至於慶曆六陽之盛天下皆君子而小人不多見也自熙寧一陰之生紛紛而至於宣靖六陰之極君子委蛇退縮波流風靡而小人荆棘多矣當熙寧之初王介甫方進也新參彈文呂誨力排辨姦一篇老泉深詆李定新入也敏求當制

而不肯草詞李蘇舍人相繼封還當時諸賢凜凜於堅冰之至也切矣秦檜再入張浚極稱其善趙鼎深信其賢能知奸人入相而獨有憂色者惟吳敦復一人而已嗚呼浚鼎因檜謹默即以為能殊不知為所賣也語曰論篤是與君子者乎色莊者乎自檜再相浸不能制嗣是以後正人盡斥而和議决成中國之屈辱益甚矣故持

書以謹其始云

廣義

大抵君子用心也坦小人用心也險坦已易見險則難知故雖張浚趙鼎之聰明先見亦為賊檜所賣况高宗乎易曰戎伏于莽三歲不興其賊檜之謂乎

陳與義罷

初朝廷議與金和趙鼎言人多謂中原有可圖之勢宜便進兵恐他時咎今日之失機與義曰若和議成豈不賢於用兵帝然之至是以疾出知湖州

夏四月詔王庶視師江淮

庶素有威望臨發勞師於都教場便服坐壇上自大將以下悉戎服步由轅門盛趨受命拜賜而出莫敢仰視至淮上遂移張俊下張宋顏軍淮西匡師古屯太平州分韓世忠二軍屯天長泗州緩急為聲援以劉錡軍駐鎮江以固根本

五月王倫偕金使來

倫至會寧見金主首謝廢劉豫次致使指會
 捷懶自河南還言于金主請以廢齊舊地與
 宋金主命群臣議幹本力言不可東京留守
 訛魯觀曰我以地與宋宋必德我阿懶折之
 曰我俘宋人父兄怨非一日若復資以土地
 是助讐也何德之有勿與便蒲盧虎位在幹
 本上捷懶訛魯觀附之由是蒲盧虎熟議以
 河南陝西地與宋遂遣倫及其太原少尹烏
 陵思謀太常少卿石慶來議事將至帝命吏
 部侍郎魏矰館伴之矰以為御史時嘗言和
 議之非不可奉詔因備論敵情之不可信秦
 檜曰公以智料敵檜以誠待敵矰曰第恐敵

不以誠待相公耳檜乃改命吳表臣思謀等
 至臨安入見帝謂輔臣曰先帝梓宮果有還
 期雖待二三年尚庶幾惟是太后春秋高朕
 旦夕思念欲早相見此所以不憚屈已冀和
 議之速成也朝臣多言其不可帝怒趙鼎曰
 陛下於金人有不共戴天之讐今屈已請和
 不憚為之者以梓宮及母后耳群臣憤懣之
 辭出於愛君不可以為罪陛下宜諭之曰講
 和非吾意以親故不得已為之但得母后及
 梓宮還敵雖渝盟吾無憾帝從其言眾議遂
 息

癸卯

直書偕來不予其自來也前書韓侂
 胄偕金使來此書王倫偕金使來則

是和出於宋而非出於金明矣忘虜大讐反求和議自書契初成以來所未嘗有也為國如此尚可望其自強哉吁

廣義 觀分注趙鼎告高宗之言是亦持兩端之說耳安得不滋賊檜之姦志乎

金以經義詞賦兩科取士○六月賜衍聖公孔

玠衢州田

凡五頃以奉先聖祠事時玠僑于衢也

秋七月彗星見

發明 祥桑生庭足以兆商家之禎白魚入舟足以啓周室之運高宗之遇天戒

庶幾憂勤然而無救於衰亂者其本不立故也彗星示變天之告戒切矣其如君德不振何忍耻偷安國事廢輟天亦莫如之何也已書之亦所以哀之也

○王倫復如金

秦檜復請遣倫如金定和議及申問諱日左正言辛次膺以國耻未雪義難講好况七上疏力諫不報乃以母疾求補外詔從之

八月金始頒行官制

初金太祖用漢官賞左企弓等因置中書省
樞密院于廣寧而其國用事者未改女真官
號斜也幹本當國勸用漢官制度畧倣中國
之制立省寺府司太宗嘗下詔改定而未畢
至是置三師三公三省六曹臺院寺
監等官宇文虛中為之參定其制

金以會寧為上京臨潢府為北京

會寧即海古之地金之舊土也按出虎水源
于此故名金源初稱為內地至是升為上京
會寧府改遼上京臨潢府為北京而東京遼
陽西京大同南京大興中京大定府則仍舊
云

冬十月罷參知政事劉大中

大中與趙鼎不主和議秦檜忌之薦蕭振為
侍御振入臺即劾大中罷之鼎曰振意不在
大中也振亦謂人曰趙丞相不待論當自為去就矣

發明

望之為政先漢君子方幸以為福而
望之不知戒懼反為小人所乘陳蕃
得志後漢君子方恃以為依而陳蕃不謹
持防反為小人所陷甚矣小人之讐隙善
類也君子持正小人持邪而小人以為君
子之異已君子執是小人執非而君子以
為小人之異心大中不主和議見忌秦檜
而蕭振鄙夫附會劾之即被罷黜豈不深

可惜哉。檜振邪媚小人，固無足責。高宗進退人才，畧無可否，是亦寄生之君焉耳。故綱目直書罷而不去其官，所以明其無罪之可罷也。

鄜延故將李世輔誘執金撒离喝來歸金人追

及之乃奔夏

世輔，綏德青澗人。自唐以來，世襲蘇尾九族都巡檢使。世輔年十七，隨父永奇出入行陣。金人犯鄜延，經畧王庶募間者，世輔往應募。有賊人夜宿陶穴，世輔縋陶穴中，得十七人，皆殺之，取首二級，馬二匹，餘馬悉折其足，庶大奇之，補充隊將。由是知名，遷副將。金人陷

延安，授永奇父子官。永奇聚泣曰：我家臣也，世襲國恩，乃為彼用邪？會劉豫令世輔帥馬軍赴東京，永奇密戒之曰：汝若得乘機，即歸本朝，無以我故貳其志。事成，我亦不朽矣。世輔至東京，劉麟喜之，授南路鈐轄，乃密遣其客雷燦以蠟書赴行在。及豫廢兀朮，以萬騎馳獵淮上，與世輔獨立馬圍場間。世輔戒吳俊往探淮水可渡馬處，欲執兀朮歸朝。俊還，世輔馳問之，為竹刺傷馬而止。兀朮授世輔知同州。世輔至鄜省父，永奇教世輔曰：同州入南山，乃金人往來驛路，汝可於此擒其首。渡洛渭，由商虢歸朝。弟報我知，我當以兵取延安而歸。世輔赴同州，即遣黃士成等持書由蜀至吳，報歸朝事。金撒离喝來同州，世輔

續編目錄卷十四 宋高宗紹興八年 三百八十二

以計執之馳出城至洛河舟船後期不得渡與追騎屢戰皆捷世輔憇高原望追騎益多撒離喝搏頰求哀世輔乃與折箭為誓不得殺同州人及害我骨肉撒離喝許之遂推之下山崖追兵爭救得免世輔携老幼長驅而北至鹿城縣急遣人告永奇永奇即挈家出城至馬翅谷為金人所及家屬三百如皆遇害世輔僅以二十六人奔夏

發明

觀李氏父子之所為蓋亦破家徇國忠於朝廷者使其謀得遂則亦庶幾累年之積憤矣故綱目特書故將書求歸皆所以予其向義也

趙鼎罷

初中書舍人潘良貴以戶部侍郎向子諲奏事久叱之退帝欲抵良貴罪中丞常同為之辨帝欲併逐同鼎奏子諲雖無罪而同與良貴不宜逐帝不從命下給事中張致遠謂不應以一子諲出二佳士不書黃帝怒顧鼎曰固知致遠必繳駁鼎問何也帝曰與諸人善蓋已有先入之言由是不樂鼎奏檜繼留身奏事及出鼎問帝何言檜曰上無他恐丞相不樂耳會殿中侍御史張戒論給事中勾濤濤言戒擊臣乃趙鼎意因詆鼎結臺諫及諸將帝聞益疑鼎乃引疾求罷且言劉大中持正論為章惇蔡京之黨所嫉臣議論出處與大中同大中去臣何可留乃出知紹興府入辭言于帝曰臣去後必有以孝悌之說脇制

陛下者將行檜率執政餞之鼎不為禮一揖而去檜益憾之鼎自再相無所施為或以為言鼎曰今日之事如人患羸當靜以養之若復攻砭必損元氣矣後王庶入對帝曰趙鼎兩為相於國有大功再贊親征皆能決勝又鎮撫建康回鑿無虞他人所不及

廣義

趙鼎之罷賊檜之謀也觀其留身奏事而不知其所言者何事但曰恐丞相不樂耳不樂之言豈非示罷鼎之意哉

雖然此亦高宗與檜志同道合故檜得售其姦耳不然檜豈得相而鼎豈得去哉及其分注載鼎辭高宗之言曰臣去後必有以孝悌之說制陛下者其意欲破和議也昔者鼎嘗教高宗諭群臣曰講和非吾意

以親故不得已為之但得毋后及梓宮還敵雖渝盟吾無憾斯言也足以矛盾今日陛辭之言也噫一人之言而前後所異如此宜乎以藉奸賊之口而墮其計也

以勾龍如淵為御史中丞

先是宰執入見秦檜獨留身言臣僚畏首尾多持兩端此不足以論大事若陛下欲欲講和乞專與臣議勿許群臣預帝曰朕獨委卿檜曰臣恐不便望陛下更思三日檜復留身奏事帝意欲和甚堅檜猶以為未也復進前說又三日檜復留身奏事如初知帝意不移乃始出文字乞決和議然猶以群臣為患中書舍人勾龍如淵為檜謀曰相公為天下大

計而邪說橫起，蓋不擇人為臺諫，使盡擊去，則事定矣。檜大喜，即擢如淵為中丞，劾異議者卒成其志。

廣義

嗚呼！人徒知賊檜之奸，而不知賊檜之奸，乃高宗有以成之也。使高宗不欲講和，賊檜安能售其奸哉？惟彼講和一事，乃高宗未怯懦之素志，故檜得以遂其奸耳。且檜雖不堅其意，高宗亦將惟檜是從，况堅之至于再至于三耶？若繩以春秋之法，當置高宗於首惡云。

金以張通古為江南詔諭使來言歸河南陝西

之地

王倫至金，金主以其右司侍郎張通古簽書宣徽院事，蕭哲為江南詔諭使，許歸河南陝西地與倫偕來。通古至泗州，要所過州迎以臣禮。知平江府何子諲不肯拜，且上言和議之非，遂乞致仕。通古至臨安，要帝待以客禮。秦檜未見國書，疑為封冊，欲帝屈已以受之。帝曰：朕嗣守太祖太宗基業，豈可受金人封冊？於是朝論籍籍。楊沂中解潛韓世良相率見檜曰：軍民洶洶若之何？退又白之臺諫，中丞勾龍如淵詣都堂與檜議，召倫責之曰：公為使通兩國好，凡事當於彼中反覆論定，安有同使至而後議者？倫泣曰：倫涉萬死一生。

往來虎口者數四。今日中丞乃責倫如此。檜等共解之曰：中丞無他，亦欲激公了此事耳。倫曰：此則不敢不勉。如淵謂檜曰：但取金書納之禁中，則禮不行而事定。給事中樓炤亦舉諒陰三年事以告檜，遂以檜攝冢宰，詣館受書。而倫亦以計說通古，通古從之。檜至館見通古，受其書。通古欲百官備禮，檜使省吏朝服導從，以書納于禁中。人情始安。通古入見，言先歸河南陝西地。徐議餘事，先是倫使金從趙鼎受使指，鼎言問禮數，則答以君臣之分已定，問地界則答以大河為界。二事使者之大指，或不從則已。倫受命而行，至是倫還有詔諭江南之名，帝歎息謂王庶曰：使五日前得此報，趙鼎豈可去邪？初檜主和議，命

韓世忠移屯鎮江。世忠言：金人詭詐，恐以計緩我師，乞留此軍蔽遮江淮。因力論和議之非，願效死節，率先迎敵。若不勝，從之未晚。章數上，皆慷慨激切。且請單騎詣闕，面奏。帝不許。及張通古來，以詔諭為名。世忠四上疏言不可從。願舉兵決戰，兵勢最重。處臣請當之。且言：金人欲以劉豫相待，舉國士大夫盡為陪臣，恐人心離散，士氣凋沮，不報及通古還。世忠伏兵洪澤鎮，將邀殺之。以壞和議，不克而罷。

發明

不著國號而曰江南，不曰通問而曰詔諭，不曰來聘而曰言來歸者，我求於彼之詞，綱目所最謹者。華夷之辨，書法如此。畧無隱諱者，罪宋也。高宗忘父母之

大讐信姦臣之欺已排斥正士銳意和戎而以詔諭為名則是金為君而宋為臣夷狄為上而中國為下冠履為之倒置矣嗚呼縱復河南陝西之地得不償失屈辱甚矧來言而未來歸者乎宋人庶耻道交國不成國君不成君臣不成臣而三綱於是掃地矣雖得天下其可以一朝居哉

廣義

嗚呼趙宋之罹金難無乃首足倒懸之極夫且以為使一事言之自徽欽

之在金軍也在金國也曰二聖通問使者二曰祈請使者一曰軍前通問使者三曰金國通問使者三曰奉迎梓宮使者一使凡十往使名甚卑其尊虜主何如也今之

虜方遣使則置其名曰江南詔諭使曰詔諭者臣民之也金何尊而宋何卑耶噫人謂高宗之中興其亦過論也歟

十一月以孫近參知政事○罷直學士院會開


詔群臣議和金得失樞密院編脩官胡銓監

廣州都鹽倉

禮部侍郎兼直學士院會開當草國書辨視制非是論之不聽遂請罷改兼侍講秦檜以溫言慰之曰主上虛執政以待開曰儒者所爭在義苟為非義高爵厚祿弗顧也願聞

所以事敵之禮。檜曰：若高麗之於本朝耳。開曰：主上以盛德登大位，公當彊兵富國，尊主庇民，柰何自卑辱至此？非開所聞也。復引古誼折之。檜大怒曰：侍郎知故事，檜獨不知也。開又詣都堂問計，果安出。檜曰：聖意已定，尚何言？公自取大名而去。如檜但欲濟國事耳。然猶慮群言，乃詔金國遣使入境，欲朕屈已受和。在朝侍從臺諫，其詳思條奏和好得失。於是開與從官張燾、晏敦復、魏在李彌遜、尹焞、梁汝嘉、樓炤、蘇符、薛徽言、御史方廷實、館職胡珪、朱松、張擴、凌景夏、常明、范如圭、馮時中、許忻、趙雍皆極言不可和。提舉洞霄宮李綱亦上疏言：朝廷使金國奉迎梓宮，往返屢矣。今倫之歸，與虜使偕，乃以詔諭江

南為名，不著國號，而曰江南，不云通問，而曰詔諭，此何禮也？臣在遠方，不知其曲折，然以愚意料之，虜為此名，以遣使其要求有五：必降詔書，欲陛下屈體降禮，以聽受一也；必有赦文，欲朝廷宣布頒示郡縣二也；必立約束，欲陛下奉藩稱臣，稟其號令三也；必求我賂，廣其數目，使我自困四也；必求割地，以江南為界五也。此五者，朝廷從其一，則大事去矣。金人變詐不測，貪憚無厭，縱使聽其詔令，奉藩稱臣，其志猶未已，必繼有號召，或使親迎梓宮，或使單騎入覲，或使移易宰相，或使改革政事，或竭取賦稅，或肢削土宇，從之則無有紀極，一不從，則前功盡廢，反為兵端，以為權時之宜，聽其邀求，可無後悔者，非愚則誣。



也。疏入不省。胡銓抗疏言曰：臣謹按王倫本一狎邪小人，市井無賴，頃緣宰臣無識，舉以使虜，專務詐誕，欺罔天聽，驟得美官。天下之人切齒唾罵。今者無故誘致虜使，以詔諭江南為名，是欲臣妾我也。是欲劉豫我也。陛下柰何以祖宗之天下為金虜之天下，以祖宗之位為金藩臣之位。陛下一屈膝，則祖宗廟社之靈，盡污夷狄。祖宗數百年之赤子，盡為左社。朝廷宰執，盡為陪臣。天下士大夫皆當裂冠毀冕，變為胡服。異時豺狼無厭之求，安知不加我以無禮如劉豫也哉。今倫之議曰：我一屈膝，則梓宮可還，太后可復，淵聖可歸。中原可得。嗚呼！自變故以來，主和議者誰不以此說啗陛下哉。然而卒無一驗，則虜之情

偽已可知矣。而陛下尚不覺悟，竭民膏血而不恤，忘國大讐而不報，含垢忍耻，舉天下而臣之，其心焉。就令虜決可和，盡如倫議。天下後世謂陛下何如主。况醜虜變詐百出，而倫又以奸邪濟之。梓宮決不可還，太后決不可復，淵聖決不可歸，中原決不可得。而此膝一屈，不可復伸。國勢陵夷，不可復振。可為痛哭流涕，長太息矣。臣竊謂不斬王倫，國之存亡未可知也。雖然，倫不足道也。秦檜以腹心大臣而亦為之，陛下有堯舜之資，檜不能致君如唐虞而欲導陛下如石晉孫。近傳會檜議遂得參政，伴食中書，漫不敢可否事。檜曰：可和。近亦曰：可和。檜曰：天子當拜。近亦曰：當拜。嗚呼！參贊大事，徒取充位。如此有如虜騎長

驅尚能折衝禦侮邪臣竊謂檜近亦可斬也臣備員樞屬義不與檜等共戴天區區之心願斷三人頭竿之藁街然後羈留虜使責以無禮徐興問罪之師則三軍之士不戰而氣自信不然臣有赴東海而死寧能處小朝廷求活耶書上檜以銓狂妄凶悖鼓衆劫持詔除名編管昭州仍降詔播中外給舍臺諫及朝臣多救之檜迫於公論翌日改銓監廣州都鹽倉宜興進士吳師古鋟其書於木金人募之千金朝士陳剛中以啓事賀銓之謫師古坐流袁州剛中謫知慶州安遠縣皆死焉晏敦復謂人曰頃言檜姦諸君不以爲然今方專國便敢爾他日何所不至耶

發明

豫章羅氏曰人君納諫之本先於虛

任必能拒諫曾開當草國書辨閱非是論之不從遂爲罷黜乃所爭以義也宋金世讐理難和好奚必議之既云詔議當察是非而忌胡銓之直諫則知議之者姑塞一時之正論殊無意於議之也高宗忘戴天之讐親狙詐之虜謂之得計可乎孟子曰於不可已而已之無所不已於所厚者薄無所不薄也高宗復讐之義乃不可已者而乃已之父母之恩不可薄者而乃薄之豈不爲萬世之罪人哉齊景公既不能令又不受命涕出而女於吳高宗既不能自強其國今反受金之命誠景公之不若矣

綱目書此辭繁而不
殺則美惡之情可見

廣義

鳴呼李胡二公之疏真可謂忠誠貫
金石節義凌冰霜者也有臣如此而

不能行其言之一二則知高
宗以中興自期者乃虛文也

王庶罷

庶論虜不可和上疏者七見帝言者六秦檜
方挾虜自重以為功細其說庶語檜曰公不
思東都抗節存趙時而忘此虜邪檜大恨庶
因乞免簽書和議文字且累疏求去遂罷為
資政殿學士知潭州

十二月以李光參知政事

秦檜既定和議將揭榜以吏部尚書李光有
人望欲籍之同押榜以息浮議乃請於帝而
用之光既受命遂於尚書省榜諭金國使來
盡割河南陝西故地通好於我許還梓宮及
母兄親族
餘無需索

廣義

假令虜意盡如賊檜所言其不共戴
天之讐決不可不復况未必如其所

言哉

以韓肖胄簽書樞密院事

己未九年金天眷二年

春正月大赦

以金國通和大赦江南新復州軍直學士院樓炤草赦文畧曰乃上穹開悔禍之期而大金報許和之約割河南之境土歸我輿圖戢宇內之干戈用全民命張俊在永州上疏言燕雲之舉其鑑不遠虜自宣和以來挾詐反覆傾我國家蓋非可結以恩信者借令虜中有故上下紛雜天屬盡歸河南遂復我必德其厚賜謹守信誓數年之後人情益解士氣漸消彼或內變既平指瑕造謠肆無厭之欲發難從之請其將何辭以對顧事理可憂又有甚於此者陛下積意兵政將士漸孚一旦北面事虜聽其號令小大將帥孰不解體蓋

自走奔以來人主奄有天下非兵無以立國未聞委質可以削平禍難者也前後凡五上疏皆不報岳飛在鄂州聞金將歸河南地上言金人不可信和好不可恃相臣謀國不臧恐貽後世譏秦檜銜之及赦至鄂飛又上疏力陳和議之非至有願定謀於全勝期收地於兩河唾手燕雲終欲復讐而報國誓心天地尚令稽首以稱藩之語疏入檜益怒遂成讐隙和議成例加爵賞飛加開府儀同三司力辭言今日之事可危而不可安可憂而不可賀可訓兵飭士謹備不虞而不可論功行賞取笑敵人三詔不受帝溫言獎譽之飛乃受命吳璘在熙州其幕客擬為賀表璘慨然曰在朝廷休兵息民誠天下慶璘等叨竊不

能宣國威靈亦可愧矣
但當待罪稱謝可也

廣義

大抵天下之事圖之於未形者易為
力圖之于已形者難為功見於未形
者智者能之而愚者不及也見於已形者
眾人皆能之惡在其為智者哉張浚之遇
高宗可謂得君之甚者也觀其建功立業
凡百所為炳炳可觀不謂之智可乎然其
薦秦檜則智者之所不為也浚也何獨明
于此而暗于彼哉且當高宗欲再用檜之
時浚當曰陛下免檜而榜其非于朝堂示
不復用豈惟在朝之臣知之天下之所共
知也况陛下親嘗詰檜曰朕比人將安歸
乎推極此言寒心切骨且當亢龍有悔之

時信義為急若再用檜是失信義于天下
也信義一失則所謂刑罰不中刑罰不中
則民無所措手足如此則在庭之臣勤王
之師誰不解體孰與陛下為理以雪父兄
之大讐大耻哉浚若言此則高宗曩時亦
未嘗受檜蠱惑之深其不再用檜也必矣
今於高宗將欲用檜反引薦之及乎檜勢
薰灼然後知悔上疏極諫果何益哉周公
戒成王曰始罔燄厥攸灼叙弗其絕此之
謂乎使浚能防於罔罔之初則其勢必不
至于不可撲滅也嗚呼張浚徒致難為之
功不識易為之力尚何智者之可名哉

二月遣判大宗正事王夬兵部侍郎張燾詣河

南脩奉陵寢

初史館校勘范如圭以書責秦檜力諫和議忘讐辱國之罪且曰公不喪心病狂柰何為此必遺臭萬世矣及金人歸河南地檜方自以為功如圭入對言兩京之版圖既入則九廟八陵瞻望咫尺今朝陵之使未遣何以慰神靈萃民志乎帝泫然曰非卿不聞此言即日遣士褒等往檜以如圭不先白已益怒如圭遂謁告去


發明

甚矣高宗之無耻也值父母之喪正哀毀之際書云高宗諒陰三年不言今而匿怨和戎忘哀肆赦寧不取譏於夷狄貽笑於天下乎河南未復志得意滿先

遣宗臣脩奉陵寢嗚呼祖宗陵寢隔絕既久高宗不能自強恢復而乃屈已要盟雖云脩奉則祖宗在天之靈亦不帖泰矣未幾虜復內侵河南隨陷高宗之求和者果可待哉故備書以貶之

以尹焞提舉萬壽觀兼侍講辭不拜

先是資善堂翊善朱震疾亟薦焞自代帝慘然曰楊時物故胡安國與震又亡朕痛惜之趙鼎曰尹焞同學淵源可以繼震乃除焞太常少卿兼崇政殿說書至是改命焞以和議為非固辭不拜



廣義

且夫仕所以行其道也和議一成則和靖之道不可行矣道既不行則雖

祿之以天下弗顧也况一官乎綱目大書辭不拜者所以表和靖之清風高節也猗

歟休哉

以王倫為東京留守

命倫交割地界又以周聿為陝西宣諭使方庭實為三京宣諭使庭實至西京先朝陵寢自永昌而下皆遇發掘而秦陵至暴露庭實解衣覆之歸以白帝秦檜怒之尋以路允迪為南京留守孟頫兼東京留守李利用權留守西京

以吳玠為四川宣撫使

玠與金人對壘且十年常苦遠餉勞民玠汰冗員節浮費益治屯田和議之成帝以玠功高授開府儀同三司四川宣撫使陝西階成等州皆聽節制遣內侍奉手札以賜至則玠病甚扶掖受命

三月王倫至汴金人歸河南陝西之地

王倫至汴見兀朮交割地界得東西南三京壽春府宿亳曹單州及陝西京西諸州之地兀朮遂自初州渡河而去移行臺于大名府

系金系... 卷之... 十一

發明 金人前此嘗書來歸武朔州矣又嘗

也曰來歸者金人心服而歸之也曰歸者

宋請而得之也中國天子請於夷狄而得

故地豈不深可耻乎然而上書王倫至汴

而下書金人歸地則其求之之意尤深切

而著明者噫高宗誠不可與論復讐之事

矣其與春秋書齊人歸我濟西田同意君

子且並觀之

廣義 時諸將恢復氣銳金

人不敢渝盟故也

以樓炤簽書樞密院事夏四月命炤宣諭陝西

炤至鳳翔承制以楊政為熙河經畧使吳玠

為秦鳳經畧使屯內地以保蜀郭浩為鄜延

經畧使屯延安以守陝炤倚秦檜

罷權吏部尚書吳敦復

和議之初敦復力詆屈已之非秦檜使人誅

之曰公若曲從兩地旦夕可至敦復曰吾終

不以身計而誤國家况吾薑桂之性到老愈

辣請勿復言檜卒不能屈權吏部甫踰月罷

知衢州

發明 敦復不附秦檜力詆和議之非觀其

對檜之語可謂富貴不能淫威武不能

青監... 宋高宗紹興九年 十三

續資治通鑑長編卷一百一十四 宋高宗紹興九年 五月

能屈者已。君子持已以義而不以利。吾於敦復見之矣。罷非其罪。故書罷而不去其官。其義自見。

五月李世輔自夏來歸賜名顯忠

世輔至夏。夏人問其故。世輔泣具言。父母妻子之亡。切齒疾首。恨不即死。願得二十萬人。生擒撒剌喝。取陝西五路。歸於夏。世輔亦得報不共戴天之讐。夏主曰。爾能立功。則不靳借兵。時有酋豪號青面夜叉者。久為夏國患。乃令世輔圖之。世輔以三千騎晝夜疾馳。奄至其帳。擒之。乃還。夏主大悅。即出二十萬以文臣王樞武臣哆訛為陝西招撫使。世

為延安招撫使。世輔至延安。總管趙惟清大呼曰。鄜延今復歸朝。已有赦書。世輔取赦文觀之。因與官屬列拜大哭。乃以舊部八百餘騎往見王樞。哆訛諭之曰。世輔以得延安府見講和。赦書招撫。可以本部軍歸國。哆訛不從。曰。初經畧乞兵來取陝西。今既到此。乃令我歸邪。世輔知勢不可。乃出刀斫哆訛不及。擒王樞縛之。夏人以鐵鷄子軍來。世輔以所部拒之。馳揮雙刀。所向披靡。夏兵大潰。殺死蹂踐無慮萬人。獲馬四萬匹。世輔揭榜招兵。每得一人。予馬一匹。旬日間得驍勇少壯者萬人。乃擒害其父母弟姪者。斬于東市。行至鄜州。有馬步軍四萬餘。吳玠遣張振撫諭之。曰。兩國見議和好。不可生事。世輔遂見玠于

續資治通鑑長編卷一百一十四 宋高宗紹興九年 五月 四十一

河池玠遣詣樓炤于長安炤承詔以為護國軍承宣使樞密行府前軍都統制送之朝世輔乃率部下三千南來帝撫勞再三賜名顯忠

發明

書來歸者世輔心服而歸之也李氏

鳴來歸不果而奔夏此書自夏來歸皆所以深予其向義之心也見君子之心樂與人為善矣

廣義

曰忠曰智曰勇此人之所難也若世輔者可謂克盡其道者歟

夏主乾順卒子仁孝立

仁孝改元大慶號乾順曰崇宗

開府儀同三司四川宣撫使吳玠卒

玠善讀史凡往事可師者錄置座右積久牆牖皆格言也用兵本孫吳務遠畧不求近小利故能保必勝御下嚴而有恩虛心請受雖身為大將卒伍最下者得以情達故士樂為之死選用將佐視勞能為高下元後不以親故權貴撓之卒年四十七贈少師謚武安自富平之敗金人專意圖蜀微玠身當其衝無蜀久矣故西人思之立祠以祀

發明

綱目於人臣之卒書爵不書爵前固已論之矣吳玠忘身殉國百戰禦金

屹然為兩川之保障忠君憂國死而不渝
自中興以來若玠者誠可謂之賢將也卒
而書爵豈
過予乎

廣義 南渡諸將世稱張韓劉岳臣惟惑于
劉光世焉當云韓岳吳張則庶乎有

得綱目
之肯

士儂張燾還自河南出燾知成都府

士儂至鄂岳飛請以輕騎從洒掃實欲觀釁
以伐謀秦檜白止之士儂出蔡穎河南百姓
歡迎夾道以喜以泣曰久隔王化不圖今日
復為宋民遂入栢城披歷榛莽隨宜葺治禮

畢而還詔封士儂為齊安郡王張燾奏疏曰
金人之禍上及山陵雖殄滅之未足以雪此
恥復此讎也必不可恃和盟而忘復讎之大
事帝問諸陵寢何如燾不對唯言萬世不可
忘此賊帝默然秦檜
患之出燾知成都府

廣義 觀燾之言所謂直氣吐而星斗寒也
高宗寧不動心哉其不亡者特幸再

秋七月以胡世將為四川宣撫副使

世將精神明悟閑習吏治初除宣撫諸將皆
賀世將語之曰世將不習騎射不知虜情朝
廷所以遣來者襲國家故事以文臣為制將
爾軍事一無改吳宣撫之規各推誠心共濟

國事可也諸將皆拜謝

金宋王蒲盧虎等謀反伏誅

金蒲盧虎自以宋長子跋扈尤甚克王訛魯觀為左丞相復附之捷懶方持兵柄遂相與謀反事覺蒲盧虎訛魯觀皆伏誅以捷懶屬尊釋不問

王倫如金金人執之

兀朮言于金主曰捷懶蒲盧虎主割河南與宋必有陰謀今宋使在汴勿令踰境倫聞之即遣介具言于朝會孟庾至汴倫即解留鑰將使指赴金國議事行至中山會捷懶等反

金人執之倫見金主于御子林致使指金主不答而令翰林待制耶律紹文為宣勘官問倫知捷懶罪否倫對不知又問無一言及歲幣反求割地汝但知有元帥豈知有上國耶倫曰比蕭哲以國書許歸梓宮太母及河南地天下皆知上國尋海上之盟與民休息使人奉使通好兩國耳紹文復曰卿留雲中已無還期及貸之還曾無以報反間貳我君臣邪乃遣副使蓋公佐還議歲貢正朔誓命等事及索河東北士民之在南者而徙倫拘于河間以待報命之至時皇后邢氏崩于五國城金人秘之

廣義 抑觀歸地者兀朮也敗盟者亦兀朮也嗚呼敗盟者虜之常事耳高宗何

續編目錄卷二 十一 三原空

愚馬

金以捷懶杜充為行臺左右丞相八月捷懶以

謀反誅

丞相命下捷懶謂使者曰我開國功臣也何罪而使我降與杜充為伍邪遂復與翼王鵬懶等謀反事覺且疑捷懶與宋陰結故主割地遂命誅之捷懶南走追而殺之于祁州其

死黨皆

發明

蒲盧荒捷懶一為金之宗室一為金之將相繼叛逆皆受典刑則犬羊

雜揉之情狀可見矣然綱目必書謀反必書伏誅者蓋亂臣賊子法所必討苟以夷狄之故而遂昧討賊之公則人欲肆而天理滅亂臣賊子將接迹於天下矣烏足謂之誅亂討逆之權衡哉

知邵州王彥卒

彥當建炎初屢敗大敵威聲振河朔號稱名將時方撓于和議遽召之還又奪其兵柄而使之治郡士議惜之

冬十二月李光罷

續編目錄卷二 十一 三原空 十八

先初謂可因和為自治之計故署榜不辭及秦檜議撤淮南守備奪諸將兵權先始極言我狄狼子野心不可恃備不可撤檜惡之光復折檜于帝前曰觀檜之意是欲壅蔽陛下耳目盜弄國權懷姦誤國不可不察檜大怒光遂求去

廣義 張浚之薦秦檜而後排之李光之署和榜而後非之是二人者正猶延盜入室而戒其取貨也悔何及哉

蒙古襲敗金人于海嶺

金胡沙虎攻蒙古糧盡而還蒙古追襲之大敗其衆于海嶺

發明 夷狄舉號外而狄之也金以全盛之時尚為蒙古所敗則其強弱之機已

可見矣故特謹而書之所以志金亡國之本

庚申十年金天眷三年春正月遣工部侍郎莫將等使

金

初將為司農丞與監察御史施廷臣附秦檜抗章力贊和議檜擢用將為起居郎廷臣為侍御史朝論大駭尚書曼敦復等上疏切諫於是二人皆不敢受命檜患之至是以將為工部侍郎充迎護梓宮奉迎兩宮使

觀文殿大學士隴西公李綱卒

綱卒于福州年五十八贈少師謚忠定綱負天下之望以一身用舍為社稷生民安危雖身或不用用且不久而其忠誠義氣凜然動乎遠邇每使者至金金人必問李綱趙鼎安否其為遠人所畏服如此朱熹曰綱之為人不知有君父而不知有身知天下之有安危而不知其身之有禍難雖以讒間竄斥屢瀕九死而其愛君憂國之志終有不可奪者可謂一世之偉人矣史臣曰以綱之賢使得畢力殫慮於靖康建炎間莫或撓之二帝何至于北行而宋豈至為南渡之偏安哉

發明

李綱忠義出於天性至其謀猷贊襄卓冠當代宋通鑑續編書提舉臨安府洞霄宮李綱卒而不書其爵陳氏綱目書提舉洞霄宮而不書其官史法固無義例也至綱目備載其官爵大書于冊以見予之之意君子固當比例考之然後知書法損益自有權度不可以其近而忽之也

廣義

分注云金人必問李綱趙鼎安否蓋言其齊等故也臣謂趙鼎大純而小疵李綱純乎純者也觀鼎變夫定都之議與夫不能察檜之奸蓋可見矣

夏四月韓侂胄罷○五月金兀朮撒哥喝分道

入寇復陷河南陝西州郡

兀术以歸河南陝西地為非計而張通古又言宋置戍河南請及其部置未定當議收復韓本然之及捷懶誅遂大閱國中兵於祁州命兀术自黎陽趨河南右監軍撒离喝出河中趨陝西分道入寇兀术率孔彥舟等入汴遣烏祿取歸德李成取河南分兵下諸郡於是東京留守孟庾南京留守路允迪皆以城降權西京留守李利用棄城走河南州縣皆降拱州守臣王慥亳州提轄魏經死之撒离喝入同州趨來興軍權知軍事郝遠開門納之陝西州縣所至迎降遂進據鳳翔初關陝新復朝廷分軍屯熙秦鄜延諸路撒离喝既

至鳳翔陝右諸軍皆隔在虜後遠近震恐秦檜以其言不讐甚懼謂給事中馮檄曰金人背盟我之去就未可卜前此大臣皆不足慮獨君鄉衮未測上意君其為我探之檄入見曰金人長驅犯順勢必興師如張浚者且須以戎機付之帝正色曰寧至覆國不用此人檜聞之喜

發明

鳥獸不可以同群夷狄不可以結信高宗惑於秦檜屈已和戎以為一隅可樂萬世無虞思削將權思撤邊備夫何訂盟未幾虜復背約所得故地尋又失之然則和議抑奚足恃乎譬猶豢養豺狼飽之以食安知其飢而不噬人也耶高宗力

排衆議銳成和好殊不知爲虜所賣耳苟以誠心歸宋何必與而復取哉厥後諸將克捷少振華風而賊臣秦檜猶主和議檜固不足責高宗若是亦可謂忘親釋怨者矣綱目因金人入寇特書于冊者旣譏宋人之不自強又見戎狄之不足信也

廣義

金虜渝盟入寇而高宗誓不復用張浚者賊檜之慶也

詔吳玠同節制陝西諸軍六月玠敗金人于扶

風復其城撒离喝走鳳翔

初胡世將在河池倉卒召諸將議時吳玠係在揚政田晟繼至諸將請少退清野以

挫其鋒渥言河池不可守玠厲聲折之曰懦語沮軍可斬也玠請以百口保破敵世將壯之指所居帳曰世將誓死于此遂遣諸帥分據渭南尋詔世將請屯蜀口以玠同節制陝西諸路軍馬時金人犯石壁砦玠遣姚仲等破走之既而撒离喝使鶻眼郎君以三千騎衝玠軍玠使統制李師顏以驍騎擊敗之虜先於扶風築城既敗入城拒守官軍攻拔其城獲三將及女真百十七人撒离喝怒甚自戰百通坊仲力戰破之撒离喝還鳳翔由是金人不敢度隴分屯之軍得全師而還

東京副留守劉錡大敗金人于順昌兀朮走汴

初錡赴東京率所部王彥八字軍三萬七千
 又殿司卒三千自臨安泝江絕淮至渦口方
 食忽暴風拔坐帳錡曰此賊兆也主暴兵即
 下令兼程而進聞金人敗盟南下錡與將佐
 捨舟陸行先趨三百里至順昌城中諜報東
 京已降知府陳規見錡問計錡曰城中有糧
 則能與君共守規曰有米數萬斛錡曰可矣
 乃與規議歛兵入城為守禦計時八字軍以
 將駐于汴皆携孥以行至是錡召諸將問計
 諸將皆曰金兵不可敵也請以精銳遮老稚
 順流還江南錡曰吾本赴官留司今東京為
 金所陷幸吾全軍至此有城可守奈何棄之
 吾意決矣敢言去者斬惟部將許清奮曰太
 尉奉命副守汴京軍士扶携老幼而來不如


相與努力一戰於死中求生也議與錡合錡
 喜乃鑿舟沉之示無去意真家寺中積薪
 門戒守者曰脫有不利即焚吾家毋辱敵手
 也分命諸將守諸門明斥候募土人為間探
 於是軍士皆奮男子備守戰婦人勵刀劔爭
 呼躍曰平日人欺我八字軍今日我當與國
 家破賊立功時守備一無可恃錡於城上躬
 自督勵取劉豫時所造廢車以輪轆埋城上
 又撤民戶扉周匝蔽之城外有民居數千家
 悉焚之凡六日粗畢而金兵已涉潁河遂圍
 城錡預於城下設伏擒敵將阿黑等二人詰
 之云韓將軍營白沙窩距城三十里錡夜遣
 千餘人擊之連戰殺敵頗衆既而金三路都
 統葛王烏祿以兵三萬與龍虎大王合而薄

城。鎬令開諸門。金人疑而不敢近。初鎬傳城
築羊馬垣。穴垣為門。至是與許清輩蔽垣為
陣。金人縱矢皆自垣端。軼著于城。或止中垣
上。鎬用破敵弓翼以神臂彊弩。自城上或垣
門射敵。無不中者。敵稍却。復以步兵邀擊。溺
河死者不可勝計。破其鐵騎數千。時順昌圍
已四日。金兵益盛。乃移砦於李村。鎬遣閻充
募壯士五百。夜斫其營。是夕天欲雨。電光四
起。見辮髮者輒殲之。金兵退十五里。鎬復募
百人。往或請銜枚。鎬笑曰。無以枚也。命折竹
為器。如市井兒以為戲者。人持一為號。直犯
金營。電所燭則奮擊。電止則匿。不動。敵眾大
亂。百人者聞吹噐聲。即聚。金人益不能測。終
夜自戰。積屍盈野。退軍。老婆灣。兀朮在汴。聞

之。即索靴上馬。帥十萬眾來援。鎬會諸將。問
計。或言。今已屢捷。宜乘此勢。具舟全軍而歸。
規曰。朝廷養兵十五年。正為緩急之用。况已
挫敵鋒。軍聲稍振。雖寡眾不敵。然有進無退。
鎬曰。府公文人猶誓死守。况汝曹邪。且敵營
甚邇。而兀朮又來。吾軍一動。彼躡其後。則前
功俱廢。使敵侵軼兩淮。震驚江浙。則平生報
國之志。反成誤國之罪。眾皆感動。思奮曰。惟
太尉命。鎬募得曹成等二人。諭之曰。遣汝作
間事。捷重賞。第如我言。敵必不殺汝。今置汝
綽路騎中。汝遇敵。則佯墜馬為敵所得。敵帥
問我如何人。則曰。太平邊帥子。喜聲伎。朝廷
以兩國講和。使守東京。圖逸樂耳。已而二人
果遇敵。被執。兀朮問之。對如前。兀朮喜曰。此

城易破耳。即置鷺車砲具不用。而械成等還。鏘兀木至城下。責諸將喪師。衆皆曰。南朝用兵。非昔之比。元帥臨城。自見鏘遣耿訓約戰。兀木怒曰。劉鏘何敢與我戰。以吾力破汝城。直用靴尖。趨倒耳。訓曰。太尉非但請戰。且謂太子必不敢濟河。願獻浮橋五所。濟而大戰。兀木曰。諾。乃下令。明日府治會食。遲明。鏘果為五浮橋於潁河上。且毒潁上流。及草中。戒軍士。雖渴死。毋飲于河。飲者夷其族。敵用長勝軍。嚴陣以待。諸酋各居一部。時大暑。敵遠來疲弊。晝夜不解甲。人馬饑渴。食水草者輒病。徃徃困乏。鏘士氣閑暇。軍皆畚休。方晨氣清涼。按兵不動。逮未申時。敵力疲氣索。忽遣數百人出西門接戰。俄遣數千人出南門。

令勿喊。但以銳斧犯之。統制官趙搏。韓直身中數矢。戰不肯已。士殊死鬪。入其陣。刀斧亂下。敵大敗。是夕大雨。平地水深尺餘。明日兀木拔營去。鏘遣兵追之。死者數萬。方大戰時。兀木被白袍乘甲馬。以牙兵三千督戰。兵皆重鎧甲。號鐵浮圖。戴鐵兜牟。周匝綴長簷。三人為伍。貫以索。每進一步。即用拒馬擁之。進一步。拒馬亦進。退不可却。官軍以鎗標去兜牟。大斧斷其臂。碎其首。敵又以鐵騎分左右翼。號拐子馬。皆女真為之。號長勝軍。專以攻堅戰。酣然後用之。自用兵以來。所向無前。至是亦為鏘軍所殺。自辰至申。敵敗。鏘以拒馬木障之。少休。城上鼓聲不絕。乃出飯。羨坐餉戰士。如平時。敵披靡不敢近。食已。撤拒馬。



木深入斫敵又大破之棄屍斃馬血肉枕籍車旗噐甲積如山阜兀木平日所恃以為彊者十損七八至陳州數諸將之罪皆鞭之遂還汴既而洪皓自金密奏順昌之捷金人震恐喪魄燕之重寶珍噐悉徙而北意欲捐燕以南棄之故議者謂是時諸將協心分路追討則兀木可擒汴京可復而王師亟還自失機會良可惜也

廣義

大抵人徒知劉錡順昌之捷而不知錡之取是捷者其要有六蓋公心以

赴急難一也示死以堅衆志二也因天變以致敵三也以忠義感人四也示弱以驕敵五也以逸而待勞六也議者以諸將不協心追討而失此機會似矣嗚呼當是時也兀木擁衆而來敵城難守危如一髮將士有必死之理順昌為必陷之城幸而勝之則心願滿足何暇窮追人情然也何足怪哉臣謂劉錡順昌之捷周瑜赤壁之勝同一機也昔者曹瞞志欲吞吳擁兵臨江旌旗舳艫一望千里吳人為之膽落矣幸而周瑜乘此東風決策一戰而老瞞逃遁不暇幾乎不免吳人之意以為為退此勅敵不猶愈於君臣被俘耶由是歡呼凱旋莫不相慶至今以為美談順昌之事何以異於是哉君子待人以恕而無求備之心不當如議者之所云也

年飛遣兵敗金人于京西

帝賜飛札曰設施之方一以委卿朕不遙度
飛乃遣王貴牛臯揚再與李寶等分布經畧
西京汝鄭穎昌陳曹光蔡諸郡又命梁興渡
河糾合忠義社取河東北州縣又遣兵東援
劉錡西援郭浩自以其軍長驅以闕中原將
發密奏言先正國本以安人心然後不常厥
居以示無忘復讐之意飛將李
寶牛臯相繼敗金人于京西

樓炤罷○遣使諭岳飛班師

時秦檜力主和議奏遣司農少
師李若虛詣飛營諭指班師

廣義 使無賊檜此舉則剖竹之
勢成矣金虜豈足滅哉

閏月金人寇涇州經畧使田晟破走之

撒爾喝與吳璘楊政夾渭河而陣璘駐兵大
蟲嶺撒爾喝覬之曰善戰者立於不敗之地
此難與爭乃引去趨邠州田晟遣將拒之於
青谿嶺胡世將又遣王老楊從儀分道而出
屢戰敗之撒爾喝還屯鳳翔既而復出攻涇
州田晟據山為陣乘虜壁未定奮兵擊敗之
奪其兵馬甚衆撒
爾喝走還鳳翔

發明 是時金虜渝盟憑陵諸夏其禍慘矣
然吳璘有扶風之勝劉錡有順昌之

勝岳飛有京西之勝田晟有涇州之勝可
見中國之兵猶足攘狄也而賊臣秦檜力

主和議詔諭班師則是自失其機會耳前以和自愚而金乃叛盟今以和自守而縱虜攻畧嗚呼金人南侵如故宋人歛兵勿爭而且卑屈講解之搶之罪可勝誅哉綱目比事而書之于冊則其義蓋可見矣

岳飛收復河南州郡

飛攻金人于蔡州破之復其城於是遣張憲敗金韓常於潁昌又復滑寧府郝晟復鄭州張應韓清復西京楊遇復南城軍喬握堅復趙州他將所至皆捷金人大震河南兵馬鈐轄李興聚兵應飛收復伊陽等八縣及汝州金河南尹李成棄城遁走詔興知河南府飛

又使張應會與復永安軍

世忠遣兵復海州

世忠使王勝等復海州父老哀金帛以犒軍勝不受世忠每出軍必戒以秋毫無犯軍之所過耕夫皆荷鋤而觀

張俊使王德復宿州金人棄壘而遁俊入亳遽

還壽春

俊遣統制王德援潁昌兵還就檄德復宿州德倍道自壽春馳至蘄縣與金遊騎遇遂入

城偃旗臥鼓遊騎引去德因潛師趨宿州夜半薄金營金人阻汴水邀戰德策馬先濟步騎從之遙謂金人曰吾與爾小大白戰雖名王貴酋莫不靡碎爾何為者金將高統軍遂投兵降守將馬秦馳入城閉門固守德叱其子順先登秦遂降宿州平德乘勝趨亳州與俵會于城父時酈瓊與葛王烏祿在亳州德至日夜義未易當也即遁去德入亳州請于俵曰今兵威已振請乘勝進取俵不從而還初德以十六騎徑入隆德府縛金守臣姚太師獻于朝欽宗問狀姚對曰臣就縛時止見夜叉耳由是人呼為王夜叉

發明

不曰還而曰遽還遽者急遽苟且之詞譏俵也是時王德敗金勇氣百倍

正宜協力進取共復中原可也夫何不從王德之請率兵遽還壽春則俵亦不能辭逗撓之責矣故書遽還以深罪之

安置趙鼎于潮州

秦檜惡鼎居越偏已徙知泉州又諷司諫謝祖信等論鼎嘗受張邦昌偽命遂奪節提舉洞霄宮鼎自泉還復上書言時政檜忌其復用又諷中丞王次翁論其乾沒都督府錢十七萬緡謫官居興化軍次翁及右諫議大夫何鑄論之不巳乃貶清遠軍節度副使潮州安置

秋七月以主次翁參知政事

秦檜薦次翁為中丞故凡可以為檜地者無不力為之及金人敗盟帝下詔罪狀兀术次翁懼檜得罪因奏曰前日國是初無主議事有小變更用他相後來者未必賢而排黜異黨紛紛累月不能定願陛下以為至戒帝深然之檜德其言遂引同列由是益安據其位公論不能撼搖矣

岳飛擊走金兀术于園城追至朱仙鎮大破之

遣使脩治諸陵

飛留大軍于穎昌命諸將分道出戰自以輕騎駐園城兵勢甚銳兀术大懼會諸帥欲併力一戰飛聞之曰金人技窮矣乃日出挑戰且罵之兀术怒合龍虎大王蓋天大王及韓常之兵逼園城飛遣子雲領騎兵直貫其陣戒之曰不勝先斬汝雲與金人戰數十合金屍布野兀术以拐子馬萬五千來飛戒步卒以麻札刀入陣勿仰視第斫馬足拐子馬相連一馬仆二馬不能行飛軍奮擊遂大破之兀术大慟曰自海上起兵皆以此勝今已矣因復益兵而前飛自以四十騎突戰敗之兀术憤甚合師十二萬次于臨穎楊再興以三百騎遇之于小商橋驟與之戰殺二千人及萬戶撒八千戶百人再與死之獲屍焚焉得

續綱目卷之四十四 高宗皇帝 四十一 蔡心

箭鏃二升飛痛惜之張憲繼至復戰兀朮夜遁追奔十五里中原大震飛謂子雲曰賊屢敗必還攻穎昌汝宜速援王貴既而兀朮果至貴將游奕雲將背嵬戰于城西雲以騎兵八百挺前決戰步卒張左右翼繼之殺兀朮壻夏金吾飛又使梁興會大行忠義兩河豪傑敗金人于垣曲又敗之于沁水遂復懷衛州斷金人山東河北之道金人大恐飛進軍朱仙鎮距汴京四十五里與兀朮對壘而陣遣背嵬騎五百奮擊大破之兀朮還汴飛檄陵臺令行視諸陵葺治之

發明

直書擊走貶而賤之也自中原淪陷諸陵廢祀雖有忠臣義士徒能北望

慨想而已今飛進軍討伐遂能脩治諸陵亦足少伸臣子之情矣綱目詳而書之蓋予之也如晉書桓温敗姚襄入洛陽脩謁諸陵同義

以楊沂中為淮北宣撫副使


劉錡為判官

岳飛奉詔班師還鄂河南州郡復陷于金

兩河豪傑李通等帥眾歸飛由是金人動息山川險要飛皆得其實中原盡磁相澤路晉絳汾隰之境皆期日興兵與官軍會其所揭旗以岳為號父老百姓爭挽車牽牛載糗糧

以饋義軍頂盆焚香迎候者克滿道路自燕以南金人號令不行兀術欲僉軍以抗飛河北無一人應者乃嘆曰自我起北方以來未有如今日之挫衄金將馬陵思謀素驍勇桀黠亦不能制其下但諭之曰毋輕動待岳家軍來即降金將王鎮崔慶李觀崔虎華旺等皆率所部降飛龍虎大王之將恠查等亦密受飛旗榜自其國來降韓常亦欲以眾五萬內附飛大喜語其下曰直抵黃龍府與諸君痛飲耳方指日渡河而秦檜欲畫澗以比與金和諷臺臣請班師飛奏金人銳氣沮喪盡棄輜重疾走渡河而我豪傑向風士卒用命時不再來機難輕失檜知飛志銳不可回乃先請張俊楊沂中等歸而後上言飛孤軍不

可久留乞連詔還飛一日奉十二金字牌乃憤惋泣下東面再拜曰十年之力廢於一旦乃自郾城引兵還民遮馬痛哭訴曰我等迎官軍金人皆知之相公去我輩無噍類矣飛亦悲泣取詔示之曰我不得擅留哭聲振野飛留五日以待民徒從而南者如市飛亟奏以漢上六郡間田處之初兀術敗于朱仙欲棄汴而去有書生叩馬曰太子毋走岳少保且退兀術曰岳少保以五百騎破吾十萬京城日夜望其來何謂可守生曰自古未有權臣在內而大將能立功於外者岳少保且不免况欲成功乎兀術遂留不去及飛還兀術遣兵追之不及而河南新復府州皆復為金有飛至鄂力請解兵柄不許已而入覲帝



問之飛拜謝而已

發明

嗚呼宋事至此浸不可為矣是時諸將進取所向有功金虜敗亡心喪膽落而中原之民簞食壺漿以迎王師誠應天順人機不可失之際也苟能假以歲月莫或撓之如易云高宗伐鬼方三年克之則不惟舊疆可復而幽燕亦可復不惟舊耻可清而沙漠亦可清惜其功業粗布沮抑復生使忠臣義士徒有黍離之嘆終不能過河與之一決可哀也已由是飛甫班師河南隨陷是則宋人知有江南而不知有江北噫固天所以限南北也雖然班師之計皆秦檜所尸其欺君誤國擢髮難數

是固萬世之罪人也或以飛雖被詔違而前進克復舊物以功贖罪不亦可乎曰禮君命召不俟駕違而前進則是有跋扈不臣之心况十二金牌一日迭至雖功蓋天下罪亦難贖君子其肯蒙首惡之名哉綱目據事而詳書于策則惜之之意為可見矣

廣義

武穆嘗言以曲直為老壯以逆順為強弱蓋兀術敗盟此可見曲逆在宋而直順在宋宋常取勝此可見壯強在宋而老弱在宋故自順昌之捷以來無將不勝無地不復者武穆之言驗矣或曰然則武穆奉詔而還何如曰不能處權變也曰

若武穆者正所以守經也守經乃所以行
 權也何不能權之有曰不然權者經之所
 自出權變之中自有一定不易之理乃所
 以為經也非經能守而即可以為權經而
 非權則子莫之中矣故曰權而得中是乃
 禮也甫刑云惟齊非齊有倫有要此之謂
 歟若武穆奉詔還師則是不能用權也權
 既失矣惡在其為守經哉昔者舜不告而
 娶嫂溺援之以手孟子皆許其權若以守
 經言之舜娶必告嫂溺不援為當也然而
 舜娶必告必無後也嫂溺不援必致死也
 謂之守經可乎然後知舜娶不告者非不
 孝也嫂溺必援者非盜嫂也乃所以行其
 權也權不失正非經而何使舜必告而娶

尾生孝已之行嫂溺不援以手豺狼禽獸
 之心皆不得謂之權也漢宣帝時有其延
 壽陳湯者奉使西域矯制誅斬郅支單于
 於康居後來宣帝因劉向之說不罪二人
 反封侯爵且宣帝何如主也決非高宗之
 庸闇武穆何如將也決非甘陳之寡謀又
 况金虜大讐決非郅支單于之比于時即
 當駐師圍城遣騎馳奏曰臣以滅賊之功
 成在旦夕詔旨諭臣臣不敢奉容臣盡俘
 金虜獻于太廟以復不共戴天之讐願伏
 矯詔之罪身潤鼎鑊其心無悔如此則蓋
 世之功武穆收之何至父子同死奸賊之
 手哉曰史稱武穆好春秋何其招禍之酷
 也曰經文用權左傳載事武穆之所好者

持左傳而已彼聖經如
化工武穆想未之及也

八月貶秘閣脩撰張九成等官

九成等皆言和議非計秦檜惡之乃貶九成
知邵州喻樗知懷寧縣陳剛中知安遠縣凌
景夏知辰州樊光遠閩州學教授毛叔度嘉
州司戶參軍九成從楊時學紹興初舉進士
對策直言無隱及為刑部侍郎會金人議和
九成言于趙鼎曰金實厭兵而張虛聲以撼
中國耳因陳十事云彼誠能從吾所言則與
之和使權在朝廷鼎罷相檜誘之曰且成
此檜曰立朝須優游委曲九成曰未有枉已而

能直人者帝問以和議九成對曰
敵情多詐不可不察檜充惡之

發明

甚矣小人之妨賢病國也疾良善則
如讐隙犯刑憲則如飲食以同已者
為賢以異已者為佞九成等因言和議之
非見忤秦檜之意貶黜於外果何謂乎噫
此乃泰極而否城復于隍之時也然則小
人之禍可勝言哉貶非其罪故書貶而不
去其

言

楊沂中軍潰于宿州走還泗金人屠宿州

沂中兵至宿州金遣間告敵騎數百屯柳子
鎮沂中自將五百騎夜襲之不見敵而還金

人以精兵伏歸路沂中軍潰遂
自壽春走歸泗金人屠宿州

九月遣使諭韓世忠罷兵還鎮

時諸大帥皆還鎮

金殺其左丞相谷神右丞相蕭慶

發明

谷神蕭慶之殺考之分注皆不載其故是必無故而殺之者也無故而殺大臣謂之善治國可乎故稱國以殺而不去其官見金之失政刑矣

○冬十月金撒離喝陷慶陽河東經畧使王忠

死之

忠植本河東步佛山忠義人以復石代等十一州功授河東路經畧安撫使及撒離喝犯慶陽知府宋萬年拒守胡世將檄忠植以所部救慶陽行次延安叛將趙惟清執忠植詣撒離喝撒離喝使甲士引至慶陽城下諭降忠植大呼曰我太行忠義也為虜所執使來招降願將士勿負朝廷堅守城壁撒離喝怒詰之忠植披襟曰當速殺我遂遇害萬年以城降後贈忠植奉國軍節度使謚義節

發明

忠植之救慶陽而為叛將趙惟清所執觀其大呼城中之言苟非明於舍

生取義之道者其能然乎是故義之所在則生有所不用也。可以避患而有所不為也。由其必有秉彝之良心故能舍生而取義。否則烏能若是哉。特書死之。予全義也。

臨安火

發明 是時宋已定都臨安其不曰京師者宋棄汴京而不守不予其都臨安也。

蓋天火曰災人火曰火秦檜專權自恣妬害忠良臨安之火安知非秦檜為之不然何以直書其火乎。


十一月金封孔子後璠為衍聖公

時金主興禮樂立孔子廟於上京求孔子後得四十九代孫承奉即璠遂封之。

發明 金夷狄也綱目書此亦予之乎曰盜賊而為君子之事固盜賊之常也盜此固書法之意也雖然中國不競而使夷狄得以竊中國之文物夷狄固可進也其如中國何哉噫此蓋君子傷時之意云爾。

十二月金始置屯田軍于中原

金既取河南猶慮中原士民懷貳始創屯田軍凡女直奚契丹之人皆自本部徙居中州與百姓雜處計其戶口授以官田使自播種春秋量給其衣若遇出師始給錢米凡屯田



之所自燕南至淮隴之比俱有之皆築壘於村落間

發明

置屯田于中原則兵民雜處且耕且守民無疑貳之意兵有就餉之資而

中原浸不可復矣特書曰始所以予金而惜宋也

辛酉 十一年 **金** 皇統 春正月 **金** 兀朮陷壽春入廬


州 詔張俊等將兵救之二月王德復和州

兀朮自敗後留屯京毫出入許鄭之間簽兩河軍與舊部凡十餘萬以謀再舉及聞秦檜召諸軍還乃攻陷壽春遂渡淮入廬州詔張俊楊沂中帥兵赴淮西岳飛進兵江州尋詔

韓世忠引兵往援時兀朮自合肥趨歷陽游騎至江張俊議分軍守南岸王德曰淮者江之蔽也棄淮不守是謂唇亡齒寒虜數千里遠來餉道決不繼及其未濟急擊之可以奪氣若遲之使少安則淮非吾有矣固請而行即渡采石俊督軍繼之宿江中德曰明旦當會食歷陽已而夜拔和州晨迎俊入兀朮退保昭關尋復來爭和州俊擊敗之既而德又敗韓常于含山縣東又敗兀朮于昭關復含山及昭關

金 人陷商州邵隆復之○楊沂中劉錡敗金兀

朮 于柘皇遂復廬州



劉錡自太平渡江與張俊楊沂中會而廬州
已陷錡乃與關師古據東關之險以遏敵引
兵出清溪兩戰皆捷兀朮以柘臯地坦平利
於用騎因駐師錡進兵與兀朮夾石梁河而
陣河通巢湖廣二丈錡命曳薪壘橋湏臾而
成遣甲士數隊踰橋臥槍而坐遣人會合張
俊楊沂中之師翌日沂中及王德田師中張
子蓋諸軍俱至惟俊後期錡與諸將分軍爲
三並進渡河以擊之師中欲俟俊至德曰事
當機會復何待即與錡上馬先迎敵沂中繼
之兀朮以鐵騎十餘萬分爲兩隅夾道而陣
德曰賊右陣堅我當先擊之麾軍渡河首犯
其鋒一酋披甲躍馬而出德引弓一發斃之
乘勝大呼馳擊諸軍鼓譟從之金人以拐子

馬兩翼而進德率衆鏖戰沂中曰虜恃弓矢
吾有以屈之使萬人持長斧如墻而進虜遂
大敗德與錡等追之又敗于東山虜望見驚
曰此順昌旗幟也即走保紫金山是役也失
將士九百人金人死者以萬計既而兀朮復
親帥兵逆戰于店步沂中等又敗之乘勝逐
比遂復廬州

發明

小人之誤國至是益見矣方諸將進

班師苟使盟誓可結則必南北弭兵各不
相犯今而不然則恃和息兵虜則挾和脩戰
自諸將還鎮之後如屠宿州陷慶陽陷壽
春入廬州陷商州攻城畧地無時休息嗚

呼縱不能恢復中原，獨不能保守滄甸，而相繼陷沒，江表震驚，然則和之一字，果何以欺天下乎？綱目一書再書不一而足，所以深罪當時，垂戒後世也。

金命致仕官至三品者給半俸。○金追封昏德

公為天水郡王，封重昏侯為天水郡公。

又封耶律延禧為豫王。

金主親祀孔子

發明 春秋之法，中國而夷狄則夷狄之，夷狄而中國則中國之。金給致仕官半俸，俸則優禮，爵臣之道，降親祀孔子，則尊崇先聖之道至是，乃夷狄而中國者也。綱目特書于冊者，豈不以中國之例待之哉。

○三月張俊楊沂中劉錡奉詔班師，金人陷濠州，俊使沂中救之，敗績。

張俊楊沂中劉錡奉詔班師，行纔數里，謀報金人攻濠州甚急，俊乃復邀沂中錡回會于黃連埠，同往援，距濠六十里，而濠南城已陷。俊召諸將謀之，沂中欲戰，錡曰：「本來救濠，今濠已失，進無所依，不若退師據險，徐為後圖。」諸將皆曰：「善。」三師鼎足而營，或言敵兵已去。

續資治通鑑綱目卷之百一十五 宋高宗紹興十二年 五十一 王頌

鏘謂俊曰敵得城遽退必有謀也宜嚴兵備之俊不聽且欲自以為功命鏘無往而令沂中與王德將神勇步騎六萬直趨濠州列陣未定煙起城中金人伏騎萬餘分兩翼出沂中顧德曰何如德曰德小將安敢議事沂中以策麾軍曰那回諸軍以為令其走也遂潰而南無復紀律金人追之死者甚衆韓世忠帥師至城下亦不利而退沂中遂入滁州俊軍入宣化鏘軍藕塘方食俊遽至曰敵兵已近柰何鏘曰楊宣撫兵安在俊曰已失利還矣鏘謂俊毋恐請以步卒禦之宣撫試觀焉鏘麾下皆曰兩大帥軍已渡我軍何苦獨戰二萬猶足取勝况今得地利又有銳兵邪遂

設三覆以待俄而俊至曰謀者妄也威方殿後之軍耳乃皆還鎮俊歸建康鏘歸太平沂

中歸
歸安

廣義

或曰自岳武穆後諸將奉詔班師者如何曰可也曰何由知其可也曰諸

將武穆之事不同也曰不同者何曰武穆之成功什有八九所爭者一二耳諸將行師之時金人之氣復壯若矯詔不還安能必其功之成乎矯詔不可也若武穆之時金人之氣銷沮殆盡矯詔不還可必其功之立就也矯詔可也通時達權奚可執一

論
哉

岳飛帥兵救濠州不及還次舒州

飛將救濠州奏金人舉國南來巢穴必虛若長驅京洛以擣之彼必奔命可坐而敵帝不從飛方苦寒嗽力疾而行又恐帝急於退敵乃奏臣如擣虛勢必得利若以敵方在邇未暇遠圖欲乞親至勦黃以議攻却帝乃詔飛會師勦黃飛至濠而城已陷遂還兵舒州以命侯

發明

凡書救善之也是時飛已班師聞濠受圍率兵往救雖已陷虜弗克成功然其忠君之心不亦誠乎救在遠者則罪在近者當時張俊諸人不能辭其責矣還

次舒州不得已之意也

金兀朮渡淮去○夏四月孫近罷○以韓世

忠張俊為樞密使岳飛為副使

秦檜力主和議恐諸將難制欲盡收其兵權給事中范同獻計于檜請除韓世忠張俊岳飛樞府則兵柄自解檜喜乃密奏桷擢之捷召三將赴行在論功行賞於是世忠俊皆入朝飛至獨後檜用王次翁計俟之七日既至遂拜世忠樞密使飛為副使並宣押至樞府治事加初沂中開府儀同三司賜名存中王德清遠軍節度使而進范同為翰林學士

續編目十四卷 三十一 何元

罷三宣撫司五月詔張俊毋飛如楚州閱軍

張俊知秦檜欲罷兵首請以所部隸御前且力贊和議檜深喜之遂罷三宣撫司以其兵隸御前遇出師臨時取旨又置三總領所於湖北淮東淮西以統諸軍錢糧時更軍制之初將士多不安乃命俊飛往淮東撫韓世忠之軍初飛在諸軍中年少以列校拔起累立顯功張俊不能平飛屈已下之淮西之役俊以糧乏怵飛飛不為止帝賜札褒諭有曰轉餉難阻卿不復顧俊疑飛漏言還朝反倡言飛逗遛不進以乏餉為辭至是俊知世忠忤檜欲與飛分其背嵬軍飛義不肯俊大不悅既至楚州俊欲脩城為備飛曰當戮力以圖

恢復豈可為退保計俊變色會世忠軍吏景著與總領胡昉言樞密若分世忠軍恐至生事昉上之朝檜捕著下大理將以扇搥誣世忠飛馳書告以檜意世忠見帝自明俊於是大憾飛遂密以飛報世忠事告檜檜大怒俊飛既還飛遂不復出掌兵其僚屬多乞宮祠而去俊每獨出視師

廣義

張俊依違小人也何以處大事決大義哉其乘時射利如此於心得無愧

乎

六月進秦檜為尚書左僕射○秋七月以范同

參知政事○罷淮北宣撫判官劉錡

錡自順昌之捷驟貴張俊楊存中嫉之至是二人言于朝曰淮西之役岳飛不赴援劉錡戰不力秦檜信之遂罷錡命錡知荆南府

廣義 諸將不協敵國之利而姦人得計也自此便覺南宋氣脉蕭索矣


八月立祚德廟于臨安

祀晉程嬰公孫杵臼韓厥也

罷知温州王居正

居正立朝累與秦檜忤且力辨王安石父子學行之非自兵部侍郎出知温州居正知不為檜所容以目疾請祠杜門言不及時事客至談論經史而已檜猶忌之諷中丞何鑄劾居正為趙鼎汲引欺世盜名奪職奉祠居正之學根据六經揚時器之出所著三經義解示居正曰吾舉其端子成吾志居正感勵首尾十載為詩書周禮辨學三十九卷與時書同進二書行天下遂不復言王氏學

發明 無道之世其政事施設無非乖舛然沒而不書則無以見其亂離之由姑以是歲觀之書韓世忠等入樞府則見其計收兵柄書罷三宣撫司則見其自沮戰



功書進秦檜尚書左僕射則見其尊用權
 姦書范周參知政事則見其寵信逆黨書
 罷劉錡則見其信小人而黜君子書罷王
 居正則見其踈正士而近奸諛夫以一歲
 之間畧無一善可書則謬妄從可知矣故
 凡易治而亂轉安而危是豈一朝一夕之
 積高宗銳意和戎委政秦檜竟忘戴天之
 讐偷安忍辱其禍至於宋亡而未已綱目
 特書屢書蓋亦有不獲已
 馬耳蓋亦有不獲已馬耳

廣義

自古邪不能害正也然能害之于暫
 不能害之於久譬諸陰霾毒霧安能
 常蔽白日乎昔也龜山居正之書不出王
 比邪說盛行一君之書一出則王氏邪說

遂沮二君其有功
 于聖門也多矣

罷岳飛奉朝請

飛以恢復為己任不肯附和議嘗讀檜奏至
 德無常師主善為師之語恚曰君臣大倫根
 於天性大臣而忍面欺其主邪兀不遺檜書
 曰汝朝夕以和請岳飛方為河北圖必殺飛
 始可和檜亦以飛不死終梗和議已必及禍
 故力謀殺之遂諷中丞何鑄侍御史羅汝楫
 諫議大夫萬俟卨交章論飛奉旨援淮西暫
 至舒蘄而不進比與張俊按兵淮上欲棄山
 陽而不守乃罷為
 萬壽觀使奉朝請


發明 孟子曰無罪而殺士則大夫可以去無罪而戮民則上可以徙張良相漢

滅楚而辟穀歸山范蠡輔越平吳而五湖遠遁至若張翰之思鱸二踈之請老又莫非見機而作者也蓋位極者勢危功高者不賞岳飛處危疑之勢立不賞之功張俊忌之於前秦檜忌之於後金人忌之於外群小忌之於中苟能見幾明決則投箸而退解組而歸儉德避難以脫小人之厄可也不能以此自圖而乃陷其坎窞自是而罷官自是而繫獄自是而屈辱自是而遭刑父子一門略無噍類其禍豈不慘哉一念不謹而貽後憂岳公亦昧於進退之機云爾綱目書此始為秦檜罪而終為岳飛

惜也

九月吳璘等收復陝西諸州詔班師還鎮

吳璘進兵拔秦州聞金統軍胡蓋與雷不祝合兵五萬屯劉家圈請于胡世將擊之世將問策安出璘曰有新立壘陣法每戰以長鎗居前坐不得起次最彊弓次彊弩跪膝以俟次神臂弓約賊相搏至百步內則神臂先發七十步強弓併發次陣如之凡陣以拒馬為限鐵鈎相連俟其傷則更代代則以鼓為節騎兩翼以蔽於前陣成而騎退謂之壘陣世將善之諸將竊議曰吾軍其殲於此乎璘曰此古束伍令也軍法有之諸軍不識耳得車



戰餘意無出於此戰士心定則能持滿敵雖銳不能當也遂進次剡家灣時胡蓋習不祝據險自固前臨峻嶺後控臘家城謂璘必不敢輕犯先一日璘會諸將問所以攻姚仲曰戰于山上則勝璘然之乃請戰敵皆笑半夜璘遣姚仲王彥銜枚渡河陟峻嶺截坡上約二將上嶺而後發火二將至嶺寂無人聲軍以畢列萬炬齊發敵駭愕曰吾事敗矣蓋不祝善謀胡蓋善戰二酋異議璘先以兵挑之胡蓋果出鏖戰璘以壘陣法更迭戰輕裘駐馬亟麾之士殊死鬪金人大敗降者萬人胡蓋走保臘家城璘圍而攻之城垂破朝廷方主和議以驛書詔班師時璘拔秦州其勢方張陝西河東首領爭來附而楊政拔隴州及破岐下諸屯郭浩復華州入陝州矣詔至璘即自臘家城引兵還河池浩還延安政還鞏世將惟浩歎而已

莫將還自金

兀术欲議和莫將久留于金乃縱之歸以道意秦檜遂奏遣劉光遠為通問使

冬十月詔以魏良臣為金國稟議使

兀术遣劉光遠還要官尊望著者為使秦檜乃奏遣良臣

秦檜矯詔下岳飛于大理獄

秦檜必欲殺飛，乃與張俊謀，密誘飛部曲能告飛事者，優與重賞。卒無應者。俊聞飛嘗欲斬統制王貴，又嘗杖之，乃誘貴告飛。貴不肯曰：「爲大將，寧免以賞罰用人，苟以爲怨，將不勝其怨。」俊因劫以私事，貴懼而從之。檜又聞飛統制王俊善告，許號鵬兒，以姦貪屢爲張憲所抑，使人諭之。王俊許諾。於是檜謀以張憲、王貴、王俊皆飛部將，使其徒自相攻。發因以及飛父子。庶帝不疑，俊時在鎮江，乃自爲狀付王俊，妄言副都統制張憲謀據襄陽，還飛兵柄，令告王貴，使貴執憲赴鎮江行樞密府。憲未至，俊預爲獄以待之。屬吏王應求白俊，以爲樞院無推勘法，俊不聽。親行鞫鍊，使憲自誣，謂得飛子雲手書，命憲營還兵計。憲

被掠無完膚，竟不伏。俊手自具獄成，告檜械憲至臨安，下大理寺獄。檜奏召飛父子證憲事。帝曰：「刑所以止亂，勿妄追證。」動搖人心。檜矯詔召飛父子，使者至，飛第笑曰：「皇天后土，可表此心。」遂與雲就獄。檜命中丞何鑄大理寺，周主畏鞫之。鑄引飛至庭，詰其反狀。飛裂裳以背示鑄，有舊涅盡忠報國四大字，深入膚理。旣而閱實，俱無驗。鑄察其寃白檜。檜曰：「此上意也。」鑄曰：「鑄豈區區爲岳飛者，強敵未滅，無故戮一大將，失士卒心，非社稷之長計。」檜語塞，乃改命諫議大夫萬俟卨、高素與飛有怨，遂誣飛令子鵬、孫革致書張憲、王貴，令虛申探報，以動朝廷。雲與憲書，令措置使飛還軍，且云其書已焚。飛坐繫兩月，無可證。

者或教尚以臺章所指淮西逗遛事為言尚喜白檜簿錄飛家取所賜御札與往來道塗日月皆可攷乃收其御札送官藏之以滅跡尚又使鵬革等證飛受詔逗留命評事元龜年取行軍時日雜定之傳會其獄大理卿薛仁輔寺丞李若樸何彥猷皆言飛無辜判宗正寺士儂請以百口保飛無他且曰中原未靖禍及忠義是忘二聖不欲復中原也皆不聽韓世忠心不平詣檜詰其實檜曰飛子雲與張憲書雖不明其事莫須有世忠曰莫須有三字何以服天下也

發明

矯詔者專輒無君之詞楊氏曰小人設險中之險以陷君子坎之初六

柔之小人設險以陷君子猶為未又設險中之險坎險也窩險中之險也蓋君子小人勢不兩立金人所忌者惟飛而秦檜所忌者亦飛以為不早驅除終梗和議是以必欲害之也誣以謀反固險矯詔下獄此非險中之險乎秦檜主之張俊萬俟卨又從而成之妄掣張憲株連岳飛身受非刑羅織抵罪嗚呼檜何讐於飛飛何負於檜耶此誠天地之大變人心所不容檜之罪又可得而粉飾之哉故書矯詔所以著其無君之罪書下岳飛大理獄所以明其誣累之非即綱目之所書驗當時之政治則宋事之興廢可知矣

廣義 少保當時若矯詔滅金而得罪豈不愈於賊檜矯詔而殺已耶

韓世忠罷

世忠深以和議為不然及魏良臣使金世忠諫曰中原士民淪于腥膻其間豪傑莫不延頸以俟弔伐之師若自此與和日月侵尋人情銷弱國勢委靡誰復振之北使之來乞與面議復抗疏言秦檜誤國之罪檜諷言官論之帝不聽而世忠連疏乞罷遂罷為醴泉觀使封福國公世忠自是杜門謝客絕口不言兵時跨驢携酒從一二童奴縱游西湖以自樂澹然若未嘗有權位者平時將佐罕得見其面

廣義 世忠之識過武穆所謂鳥見弓而高飛魚驚釣而遠逝賊檜之勢可畏矣

十一月范同罷○安置李光于藤州

秦檜忌光諷中丞萬俟卨論光陰懷怨望與孫近朋比安置藤州藤州守臣以光詩有諷刺者獻于檜檜怒令言者論之再竄瓊州

和議成以何鑄簽書樞密院事奉表稱臣于金

兀朮以蕭毅邢具瞻為審議使與魏良臣偕來議以淮水為界求割唐鄧二州及陝西餘地歲幣銀絹各二十五萬仍許歸梓宮太后帝悉從其請命宰執告祭天地宗廟社稷命

鑄往使誓表畧曰臣構言今來畫疆以泃水中流為界西有唐鄧州割屬上國自鄧州西四十里并南四十里為界屬鄧四十里外并西南盡屬光化軍為弊邑沿邊州城既蒙恩造許備藩方世世子孫謹守臣節每年皇帝生辰并正旦遣使稱賀不絕歲貢銀絹二十五萬兩匹自壬戌年為首每春季差人般送至泗州交納有渝此盟明神是殛陸命亡氏陪其國家臣今既進誓表伏望上國早降誓詔庶使弊邑永為憑焉毅辭帝諭曰若今歲太后果還自當謹守誓約如今歲未也則誓文為虛設鑄至泃見兀朮遂如會寧兀朮尋遣人來復求商州及和尚方山二原

發明

春秋莊九年書公及齊大夫盟于訖君子譏公之釋父怨親仇讐成二年

書公會楚公子嬰齊于蜀君子譏其中國諸侯降班失列下與夷狄大夫會也然而春秋所最重者父母之讐所最謹者華夷之辨高宗惑賊檜之邪謀恃和戎之陋策忘親釋怨降尊居卑名義甚悖蓋漢亦曾和單于不過賜之以玉帛妻之以公主唐以嘗和突厥不過遺之以歲幣加之以可汗五代石敬瑭借兵契丹稱臣奉貢此非一統之主君子猶且譏之宋自真宗訂盟耶律南兄比弟僅克比肩高宗受命中興天下共主言地則多於敬瑭言名則正於晉氏而乃君父於金苟焉無耻胡銓嘗曰

以祖宗之天下為金虜之天下，以祖宗之位為金虜藩臣之位。陛下屈膝，則祖宗廟社之靈，盡污夷狄。祖宗數百年之赤子，盡為左衽。且稱藩奉貢云者，非其有而得之。如劉豫、張邦昌之徒，則志得意滿，舉天下而臣之，甘心焉。高宗所居者，祖宗之位。所守者，祖宗之業。祖宗土地不能恢復，父母讐耻不能報償，易怨而為恩，忘哀而作喜，貶國為邑，自卑尊人。雖至愚者，弗克忍為高宗樂而行之。是誠何心哉！觀之誓表，猶可慙赧。是蓋天地晦冥，日月薄蝕，足為上而首為下，其屈辱亦已甚矣。將何顏面以處臣民之上？將何誥敕以謁祖宗墳陵？則雖帝有江南，奚足貴耶！綱目直書于冊。

不再貶而其失自見

廣義

嗚呼！用奸臣殺良將，甘心降虜而忘父兄。毋妻之大讐者，此高宗之素志也。

君子奚獨罪檜哉！綱目大書奉表稱臣于金者，所以遺其萬年之臭也。人以南渡為中興，謬矣。

遣使割唐鄧商秦之地以畀金

京西割唐鄧二州，陝西割商秦之半，止存上津、豐陽、天水三縣。及隴西成紀餘地，棄和尚方山、二原，以大散關為界。於是宋僅有兩浙、兩淮、江東、西、湖南、北、四蜀、福建、廣東西、十五

路而京西南路止有襄陽一府陝西路止有
階成和鳳四州凡有府州軍監一百八十五
縣七百三金既畫界建五京置十四總管府
凡十九路其間散府九節鎮三十六守禦郡
二十二刺史郡七十三軍十有六縣六百三
十二○初邵隆在商州十年披荆榛瓦礫以
為治招徠流散屢敗金人終不肯離商而去
值和議成割商與金隆常快快徙知金州嘗
以兵出虜境秦檜恨之徙知叙州檜陰使人
酖之

發明

宋人求和於金者必有所利而為之
馬奉表稱臣極其屈辱而金人未聞
有一毫利宋反為割地以附益之且唐鄧
商秦宋之故土高宗即位十五年未能復

侵疆之咫尺而乃棄其四州割以啗虜則
是虜不亡一鏃而得四州之地也是時宋
之境內僅有十五路而金之境內乃有十
九路由此觀之三分天下金有其二宋得
其一耳自是以後偷安一隅粉飾太平諱
言兵事宋之所謂中興之業者止於如此
而已矣豈不深可哀哉天下未一讐耻未
雪而先為自畫之計高宗誠五霸之罪人
也綱目特書于策所以惡
其釋父怨親仇讐之意云

秦檜殺故少保樞密副使武昌公岳飛

歲已暮而飛獄不成一日檜手書小紙付獄
即報飛死矣年三十九雲與張憲皆棄市于

鵬等從坐者六人籍飛家貲徙之嶺南於是
 薛仁輔李若樸何彥猷皆被黜布衣劉允升
 上書訟飛冤下大理獄死凡傳成其獄者皆
 進秩洪皓在金以蠟書奏金人所畏服者惟
 飛至以父呼之及聞其死諸酋酌酒相賀飛
 事親孝家無姬侍吳玠素服飛願與交驩飾
 名姝遺之飛曰主上宵旰豈大將安樂時和
 却不受玠益敬服帝欲為飛營第飛辭曰金
 虜未滅何以家為或謂天下何時太平飛曰
 文臣不愛錢武臣不惜死天下太平矣卒有
 取民麻一縷以束縛者立斬以徇卒夜宿民
 開門願納無敢入者軍號凍死不拆屋餓死
 不鹵掠卒有疾飛躬為調藥諸將遠戍飛遣
 妻問勞其家死事者哭之而育其孤或以子


婚其女凡有頒犒均給軍吏秋毫不私善以
 少擊衆嘗以八百人破群盜王善等五十萬
 衆於南薰門以八千人破曹成十萬衆於桂
 嶺其戰兀木於順昌則以背嵬八百於朱仙
 鎮則以五百皆破其衆十餘萬凡有所舉盡
 召諸統制與謀謀定而後戰故有勝無敗猝
 遇敵不動故敵為之語曰撼山易撼岳家軍
 難張俊嘗問用兵之術飛曰仁信智勇嚴闕
 一不可飛好賢禮士覽經史雅歌投壺恂恂
 如書生每辭官必曰將士效力飛何功之有
 然忠憤激烈議論持正不挫于人卒以此得
 禍史臣曰西漢而下若韓彭絳灌之為將代
 不乏人求其文武全器仁智並施如岳飛者
 一代豈多見哉而卒死于秦檜之手蓋飛與

檜勢不兩立使飛得志則金讐可復宋耻可雪檜得志則飛有死而已昔檀道濟曰自壞汝萬里長城高宗忍自棄其中原故忍殺飛嗚呼冤哉

發明 甚矣小人之心殘忍而酷暴也欲執國命則志在欺主欲行私意則志在

妨賢蓋不欺主則權勢有不可專不妨賢則私意有不可遂趙高欲專權則矯詔以殺扶蘇秦檜欲和虜則矯詔以殺岳飛皆異世而同符者也然既稱臣于金又割地以畀虜所求必遂無顧不從宜乎金之報聘也何待次年始有冊帝歸喪之事耶則知割地稱臣猶未足以快虜既殺岳飛金首相慶始遣報使南北弭兵則賊檜之與虜為一可見矣嗚呼賊檜姦邪固不足責高宗忘讐事虜挈全國以付秦檜任其所為弗與之較欲稱臣則從其稱臣欲割地則聽其割地欲殺岳飛則順其殺飛黃帝堯舜垂衣裳而天下治豈若是之無為乎殺者殺無罪也書殺而不去其官所以明其無罪耳考之前史皆以殺飛為文綱目歸獄於檜變文直書秦檜殺故少保樞密副使武昌公岳飛具官書爵檜豈得而擅殺之乎原情定罪立法謹嚴然後是非正曲直分賊檜之欺君僭竊之罪不容掩矣凡若此類微君子莫能修之

廣義 此何以書秦檜殺書秦檜殺者所以著賊檜專殺無君之心也然則於岳



飛書故少保樞密副使武昌公者何書此者所以復其銜以伸萬古之寃也

壬戌十二年

金皇統一年

春二月進封建國公瑗為普

安郡王

封崇國公瑗為恩平郡王

詔諸州脩學宮○何鑄還自金

初蕭毅至臨安帝曰朕有天下而養不及親微宋無及矣今立信誓明言歸我太后朕不耻和不然朕不憚用兵及何鑄曹勛往帝召至內殿諭之曰朕北望庭闈無淚可揮卿見

金主當日慈親之在上國一老人耳在本國則所繫甚重以至誠說之庶彼有感鑄至金首以太后為請金主曰先朝業已如此豈可輒改曹勛再三懇請金主乃許之遂遣鑄還許歸徽宗及鄭后后之喪與帝母韋氏

三月放齊安王士儂于建州

秦檜惡其救岳飛也

四川宣撫副使胡世將卒以鄭剛中代之

剛中節制諸將極嚴每入謁必先庭揖然後就坐吳璘陞少師語主閣吏乞講鈞敵之禮

剛中日少師雖尊猶都統制爾倘
變常禮是廢軍容璘皇恐聽命

夏四月金使人以袞冕來冊帝

金遣左宣徽使劉善以袞

冕圭冊冊帝為大宋皇帝

發明

宋於金則書奉表稱臣金於宋則書
以袞冕來冊帝中國屈於夷狄足上

首下至是極矣貶中國之鴻名受夷狄之
穢號悲夫綱目書此蓋亦有不得已焉者
可哀也哉

廣義

分注云冊帝為大宋皇帝噫金虜向
嘗冊劉豫為大齊皇帝今其冊命與

豫同者劉豫高宗
也胡銓之言驗矣

五月初置榷場于盱眙

其後又置于光州棗陽安豐軍

金亦置榷場于壽鄧州鳳翔府

六月安置王慶于道州○何鑄罷

秦檜以鑄不傳會岳飛之獄怨之諷萬俟卨
論其過欲竄諸嶺表帝不許遂出知徽州後
復責授秘書少
監徽州居住

八月以萬俟卨參知政事○金人歸徽宗皇帝

顯肅皇后鄭氏及懿節皇后邢氏之喪

喪至帝易總服
奉安龍德別宮

發明

春秋之法凡書歸者請而得之也來歸者心服而歸之也高宗備受屈辱而父母不得生還徒以哀丐於虜僅歸昔者靈輜抑不知父母旅魂抱恨泉壤亦已久矣詩云永言孝思孝思維則使高宗苟能明此則必汗顏恚憤而思必報其讐豈肯苟安而已哉則是高宗惟冀和議成而不知大讐必報也綱目書此乃深貶之

皇太后韋氏至自金

后有智慮初聞金人許還三梓宮后恐其不覆呼役者畢集然後起攢宮時方暑金人憚行后慮有他變乃陽稱疾須秋涼建發已而稱貸于金使得黃金三千兩以犒其衆由是途中無慮帝至臨平奉迎見后喜極而泣后至臨安入居慈寧宮

九月以孟忠厚為樞密使

充攢宮
總護使

大赦加秦檜太師封魏國公

以和好
成也

發明 加不宜加也。書曰：任官惟賢才，左右惟其人。臣為上為德，為下為民，其難其慎，惟和惟一。古先哲王之用賢，必防小人，必任君子，而秦檜總權罔上，辱國妬賢，安可以國公加之乎？噫，高宗以和議甫成，肆赦加爵，殊不知所失亦已多矣。安有明哲之君，忍耻臣虜，其於自欺而尚可，以論人道哉！直書于冊，深譏之也。

遣使如金

沈昭遠賀生辰，楊愿賀正旦，賀禮俱用金茶器千兩，銀酒器萬兩，錦綺千匹，金循契卅例，不欲兩接使人，故併遣使，歲如之。

十一月，擯徽宗皇帝顯庸皇后于永固陵，以懿節皇后祔。

節皇后祔

尋改陵曰永裕，在會稽。

以程克俊簽書樞密院事，進封秦檜為秦魏

兩國公辭不拜

以太后回鑾推恩也。檜以封兩國與秦京同故辭。

發明

凡前代專權之臣，綱目書其自為相，國自加九錫，復辭不受者，所以見其

矯偽欺世之罪至於賊檜之事則書進封秦檜為秦魏兩國公而能辭不拜者何哉檜以封兩國與蔡京同所以辭之故綱目因而書以辭不拜耳然而檜不受而直書不拜則直暴怒峻却之而已此書法所以異於前代也嗚呼亂臣賊子至於專權無君極矣孰知於專權無君之中又有已甚焉者其視晉宋齊梁為愈下矣世變至此可歎也哉

十一月張俊免

初俊贊秦檜成和議約盡罷諸將獨以兵權歸俊及和議定諸將罷而俊無去意故檜諷

臺臣江邈論之遂罷為鎮洮崇信等軍節度使充醴泉觀使進封清河郡王奉朝請

劉光世卒

光世在諸將中最先進律身不嚴馭軍無法不肯為國任事嘗入對言願竭力以報國他日史官書臣功第一帝曰卿不可徒為空言當見之行事建炎初結內侍康履以自固又早解兵柄與時浮沉不為秦檜所忌故能竊寵榮以終其身方之韓岳不逮遠矣

徽猷閣待制致仕尹焞卒

焞質直弘毅實體力行程頤嘗以魯許之且曰我死而不失其正者尹氏子也

發明

綱目於劉光世尹焯之卒一削其官一具其官則二人之賢否書法之予

奪可見矣君
子宜細觀之

詔秘書少監秦熺脩日曆

秦熺無子取妻兄王煥孽子熺養之南省擢為第一熺以為嫌進士陳誠之策專主和議乃以為首熺次之歷官秘書少監熺自知不為士論所與乃以熺領國史自熺再相凡詔書章疏稍及熺者率更易焚棄因以太后北還為已功自領其事使著作郎王揚英周執羔上之

廣義

分注云秦熺自知不為士論所與乃以其子領國史而掩其惡熺能掩於當時其能掩於後世乎秦熺掩之而他史則不為之掩也綱目據其實而書之者甚

檜之

惡也

孟忠厚罷

忠厚始以外戚貴顯然能避權勢不以私干朝廷秦熺忠厚之僚婿也未嘗親附世以此重之至是山陵畢熺諷臺諫引故事外戚不預政罷之

十二月陝西大旱

初陝西連歲不雨至是涇渭灞
澗皆竭民無以食多餓死者

發明

軍旅之後必有凶年此春秋伐萊之
後繼以大旱也此書大旱者賊槍專
權妨賢病國而內外怨咨之氣感動天變
而旱乾作矣其以大旱書者傳曰或不雩
或雖雩而不雨也不雩則無憂國恤
民之心雩而不雨格天之精意微矣

西遼耶律大石妻蕭氏死子夷列立

夷列改元紹興籍民十八歲

以上者得八萬四千五百

癸十三年 金皇統 春正月作太學

宅為之

二月作景靈宮

遣官自温州奉迎祖宗神御至遂請天章閣
西殿告遷徽宗及顯恭顯蕭二后神御併奉

焉安

廣義

臣謹按春秋父兄之讎不共戴天况
在汴諸陵俱懼發掘之禍耶高宗以
怯懦自居而甘心臣虜其得罪于宗祧也
多矣今而作宮虛奉不過脩飾外貌而欲
偷安於一隅耳何足道哉

三月築太社太稷壇及園丘

發明

於戲宋人忘讐釋怨粉飾太平之心益著矣剛明之君必曰一城未復祖

宗之耻未雪也一地未歸祖宗之耻未雪也一族未返祖宗之耻未雪也名分未正也祖宗之耻未雪也高宗失中原而不能復棄宗族而不能返貶稱臣而不能正則是祖宗之耻未雪一二誠五內分裂無望生全之時也而乃作太學作景靈築社稷立園丘紛紛制作繼書于冊自以江南為苟安之計而讐耻中原付之不問豈不可耻之甚乎盖天子天下之父既亡其耻則一匹夫之不若耳詳書于冊盖譏之也

夏閏四月立貴妃吳氏為皇后

后開封人年十四選入王邸帝既即位后常以戎服侍左右習書史善翰墨寵遇日隆累進貴妃帝憐邢氏在金虛中官以待其還至是秦檜累表請立后皇太后亦以為言帝從之

壬次翁罷

時秦檜當國凡居政府者莫不以微忤斥始終不貳於檜者惟次翁一人而已

五月停給僧牒

先是臨安府乞度牒脩觀音殿帝不與特給錢五十緡曰朕觀人主欲消除釋老或毀其徒皆不適中往往而熾今不放度牒可以漸消而吾道盛矣至是命停給雖特旨亦令執

奏

六月程克俊罷○秋七月行人洪皓張邵朱弁

還自金

自建炎以來奉使如金被拘囚者三十餘人多以物故惟三人以和議成許歸已而金人遣七騎追之及淮而皓等已在舟中矣皓居冷山距會寧二百里地苦寒穴居百餘家陳

王谷神聚落也谷神敬皓使教其子或二年不給衣食盛夏衣簾布嘗大雪薪盡以馬矢然火煨麩食之或獻取蜀策谷神持以問皓皓力折之谷神銳意南侵曰孰謂海大我力可乾但不能使天地相拍耳皓復辨之谷神怒曰汝作和事官而口硬如此謂不能殺汝邪皓曰自分當死顧大國無受殺行人之名願投之於水以墜淵為辭可也谷神義之而止皓屢因謀者密奏敵情且力言和議非討乞興師進擊嘗求韋太后書遣李徽持歸帝大喜曰朕不知太后寧否幾二十年雖遣使百輩不如此一書每遇貴族名家子流落于金者盡力拯救之留金十五年而還入對內殿求郡養母帝曰卿忠貫日月志不忘君雖

蘇武不能過豈可捨朕去邪。皓退見秦檜語連日不止曰張和公金人所憚乃不得用錢塘暫居為景靈宮太廟皆極土木之華豈非示無中原意乎檜不懌遂除徽猷閣直學士提舉萬壽觀復以論事忤檜出知饒州邵被囚柞山踰年送劉豫使用之邵見豫長揖而已又呼豫為殿院責以君臣大義詞氣俱勵豫怒械于獄久之復送于金拘之燕山僧寺從者皆莫知所之邵又以書言于金曰劉豫挾大國之勢日夜南侵不勝則首鼠兩端勝則如養鷹飽則颺去終非大國之利金人徒之會寧及還入見除秘書脩撰主管祐神觀司諫詹大方論其使事無成改台州崇道觀并副王倫使金既就館守之以兵久之金將

議和當遣一人受書還欲并與倫探策決去留并曰吾來固自分必死豈應今日覲幸先歸願正使受書歸報天子成兩國之好蚤伸四海之養于兩宮則吾雖暴骨外國猶生之年也倫將歸并謂曰古之使者有節以為信今無節有印印亦信也願留之使并得抱以死死不腐矣倫解以授并并受而懷之臥起與俱金人迫并仕劉豫且誅之曰此南歸之漸并曰豫國賊吾嘗恨不食其肉又忍北面臣之吾有死耳金人怒絕其餼遺以困之并固拒驛門忍饑待盡誓不為屈金人感動致禮如初久之復欲易其官并曰吾官受之本朝有死而已誓不易以辱吾君也又以書訣洪皓曰殺行人非細事吾曹遭之命也要當

舍生以全義耳。乃具酒召被掠士夫飲半酣。語之曰：「已得近郊某寺地，一旦畢命報國，諸公幸瘞我其處，題其上。」曰：「有。」遂通問副使朱公之墓於我幸矣。衆皆泣下，莫能仰視。弁談笑自若曰：「此臣子之常，諸君何悲也。」及粘沒喝死，弁密疏金國虛實曰：「此不可失之時也。」遣李發間行歸報。王倫還以弁奉送徽宗大行之文為獻。其辭有曰：「歎馬角之未生，魂消雪窖，攀龍髯而莫逮，淚灑冰天。帝讀之感泣，官其親屬五人，謂丞相張浚曰：「弁歸日當以禁林處之。」及還入見便殿，弁謝且曰：「陛下與金人講和，上返梓宮，次迎太母，此皆知時知幾之明。然時運而往，或難固執。幾動有變，宜鑑未兆，盟可守而詭詐之心，宜嘿以待之。」兵

可息而消弭之。術宜詳以講之。金人以黷武為至德，以苟安為太平，虐民而不恤民，廣地而不廣德。此皆天助中興之勢。若時與幾，陛下既知於始，願圖厥終。帝曰：「善。」秦檜惡其言，奏以初補官易宣教，即直秘閣而卒。

發明

直書行人洪皓、張邵、朱弁還自金，事不辱也。高宗建炎初，書遣洪皓等使

金。至是凡十五年矣。書還自金，則其全節可知。然無褒美之詞，何哉？蓋亦臣子當為之事故爾。此又綱目之深意也。如漢書蘇武還自匈奴同意。

廣義

洪皓、朱弁可謂不辱君命者矣。味諸分注，義自見矣。

帝書六經刻石于太學○冬十二月朔日食

是日陰雲不見秦
檜率百官稱賀

金人來聘

賀正旦也禮物金酒器六事色綾羅
紗縠三百段馬六匹自是歲如之

發明

女真自政和五年始改號金宣和七年入寇靖康元年入寇建炎三年入寇皆以號舉者惡其猾夏不恭故狄之也至是來聘遂稱人者嘉其慕義自通故進之也此固綱目取法春秋之深意耳

復置三館

上謂宰執曰人才須素養本宋置三館養天下之士至仁廟人才輩出為用今日若不興學校將來安得人才用邪

甲子

十四年

金皇統四年

春正月樂平水闢

樂平縣何衝里田隴數十百頃田中水類為物所吸聚為一直行高平地數尺不假隄防而水自行里南程氏家井水溢亦高數尺天矯如長虹聲如雷穿墻毀樓二水闢于杉墩且前且却約十餘刻乃解各復故

發明

水者陰類，樂平水闖異之異者，自有書契以來，災異雖多，然未聞水闖者。此綱目之所特書也。書曰：嗚呼！天難諶命，靡常常厥德，保厥位，厥德靡常，九有以亡。高宗信任非人，忘讐事虜，則其逆氣所激，固有致夫災異者。而宋之君臣方且溺於宴安，恬無警省，天變豈有虛生之理哉！弗克畏天，災咎之來必矣。

二月萬俟卨罷以樓炤簽書樞密院事

初，卨自金還，秦檜假金人譽已數千言，屬卨以聞。卨難之，他日奏事退，檜坐殿廡中，批上旨，輒除所厚者官吏鈐紙尾進。卨曰：不聞聖語，却不視檜，大怒，自是不交一語。諷言官李

文會詹大方論之，尚遂求去。

三月帝謁孔子廟，遂視學

國學大成殿成，司業高閎表請帝視學，從之。止輦於殿門外，步趨升降，退御敦化堂，命禮部侍郎秦熈執經，高閎講易泰卦。胡宏見其表，移書責之曰：太學，明人倫之所在也。太上皇帝，刼制於疆敵，生往死歸，此臣子痛心切骨，臥薪嘗膽，宜思所以必報之大讐也。太母天下之母，其縱釋乃在金人，此中華之大辱，臣子所不忍言也。而柄臣乃敢欺天罔人，以大讐大辱而為大恩，閣下目覩忘讐滅理，北面敵國，以苟宴安之事，猶偃然為天下師儒。

之首既不能建大論明天人之理以正君心
乃阿諛柄臣希合風旨求舉太平之典又從
而為之詞欺罔孰
甚焉宏安國子也

發明

尊師重傳崇學尚文固帝王之美事
然又不可以槩論也高宗忘戴天之

雙習偷安之事謁聖視學掩飾虛文宜乎
有以來胡宏之譏也春秋所貴者復讐之
義綱目所貴者亦復讐之義忘親釋怨又
豈春秋綱目之所貴哉故書帝謁孔子遂
視學文無貶詞乃所以深
貶之耳美惡不嫌同詞

廣義

高宏請帝視學似矣然高宗之時乃
迤否蹇剥之時也豈泰道之世乎胡

宏責之何
其當哉

夏四月初禁野史

從秦檜請也後著作郎林機言有失意之人
匿迹近地窺伺朝廷作為私史以售其邪說
請禁絕之復
下詔申禁之

發明

大抵史者公天下後世之是非者也
豈一人之私而能滅衆人之公論哉

賊檜掩護其惡之不暇亦愚矣嗚呼使果
能禁則自呂秦以至于今人皆不知聖賢
之訓是非顛倒黑白不分久矣善乎呂東
萊曰史官萬世是非之權衡禹不能褒鯀

管蔡不能貶周公，趙盾不能改董狐之書，
崔氏不能奪南史之簡，公是公，非舉天下
莫之能移焉。昔司馬遷作史記，武帝惡其
直筆，刊落其書，然公議之在天下，抑則揚
塞則決，窮則通，縱能削一史官之書，安能
梏天下之筆乎？書曰：禁野史者，譏檜之愚
也。

五月樓炤罷以李文會簽書樞密院事

文會劾炤罷之，遂命文會代炤。
自是執政免，即以言者代之。

閩浙大水

內侍右武大夫白鏐從皇太后北歸者，因閩
浙大水，宣言燮理乖盭，洪皓名聞華夷，顧不
用鏐館客張伯麟嘗題太學壁云：夫差而忘
越人之殺而父乎？秦檜怒之，俱坐誹謗，刺配
鏐於萬安軍，伯麟於吉陽軍，罷皓提舉江州太平觀。

發明

是時宋之君臣偷安忍耻，共行逆德，
而陰沴之應必矣。蓋燮理陰陽，宰相
之職，陰陽不和，固宰相之責也。秦檜位首
相，燮理乖方，侮慢自賢，大逆不道，而乖氣
磅礴，則有以致夫異氣、大水之應，不在茲
乎？而賊檜方且惡白鏐、張伯麟之諷諫，刺
配遠方，吁災異之來，不知戒懼而又罪直
言之士，則其忽慢天變，豈不從可知哉。

秋八月金主亶殺其子魏王道濟

發明 陳人殺其公子禦寇君子以為公子之重視大夫殺而或稱君或稱國或

稱人何也稱君者獨出於其君之意而大夫國人不與焉如晉殺世子申生之類是也蓋父子之恩出於天性金主無故而擅殺其子則其於父子之道亦大悖矣殺殺無罪也仁者以其所愛及其所不愛不仁者以其所不愛及其所愛書主斥名惡自

見耳

○九月徙趙鼎于吉陽軍

秦檜怨鼎不附和議凡鼎所善者如張元虞折彥質張戒解潛辛承宗皆指為鼎黨貶斥之鼎在朝五年杜門謝客時事不掛口有問者引咎而已先是鼎請正建國公皇子之號檜言鼎欲立皇太子是待陛下終無子也宜俟親子乃立至是中丞詹大方希檜意劾鼎與其黨范冲邪謀密計轉相扇惑以徼無妄之福蓋指皇子而冲嘗為翊善故也遂移鼎吉陽鼎謝表有曰白首何歸悵餘生之無幾丹心未泯誓九死以不移檜見曰此老倔強

猶晉

冬十月何若請黜程頤之學

右正言何若指程頤張載遺書為專門曲學請戒內外師儒之官力加禁絕秦檜從之

十二月李文會免以楊愿簽書樞密院事

愿為中丞迎合檜意以舉劾人號之為肉簡牌至是論文會遂代其位

王倫為金所殺

金欲以倫為平州路轉運使倫曰奉命而來非降也金脇以威遣使來趣倫拒益力金杖其使俾縊殺之

發明 王倫往返金國贊成和議不為無罪故其見殺而不書金殺王倫而書王

倫為金所殺所以明其有可殺之道故遂得而殺之焉耳雖然王倫固有贊成和議之愆然亦上之所命非倫之自行也則是受命天朝奉將使指其權初不在已故綱自書此正以著秦檜陷害之意若曰朝有使臣如王倫者不能保全終始乃使之為金所殺故夫金虜非能殺王倫乃是朝廷使王倫為金虜所殺耳書法如此其所以歸罪當時之意為何如哉如唐書顏真卿為李希烈所殺同義

乙丑十五年 金皇統 春正月朔初御大慶殿受朝

發明 嗚呼高宗誠無足與論復讐之事矣胡氏曰父母之讐不共戴天兄弟之

讐不與同國朋友之讐不同市朝今高宗與金虜不共戴天無時焉而可忘也顧乃御殿受朝晏然自肆則是忘親釋怨非人子矣獨不計父母客死窮荒中原淪沒夷狄抑且稱臣奉貢撤備罷兵高宗非無人心者何故溺於自棄甘於受辱而行此姑息之事哉直書曰初深貶之也

○夏四月朔彗出東方大赦

發明

書曰夏王弗克庸德慢神虐民皇天弗保監于萬方格迪有命眷求一德俾作神主惟尹躬暨湯咸有一德克享天心受天明命以有九有之師爰革夏正然

樂之所以失天命湯之所以得天命者以此是時彗出東方其異滋甚高宗未聞有省已責躬之實而徒肆赦播於境內抑足以為弭變之道乎弗克庸德慢神虐民天命安得而不失哉據事直書其義自見

○六月朔日食○帝幸秦檜第

上賜檜第又賜銀萬兩絹萬匹錢萬緡綵千匹車駕親幸加檜妻兩國夫人子熺學士承旨婦郡夫人孫墳堪坦並除直秘閣賜三品服墳時方九歲尋書一德格天之閣大字賜檜後又命作檜家廟賜以祭器

發明 幸檜第何以書譏之也屈萬乘之尊
幸佞臣之第則其失尊卑之道明矣

况秦檜姦邪尤不足幸者乎則是高宗知
有秦檜而不知有宗社也豈不深可愧乎

廣義 此即徽宗幸蔡京王黼之第耳觀分
註之備載則知高宗之貨賊檜其真

宋王旦之流弊歟然曰一德格天者
臣見成湯伊尹不如是之狂妄也

秋七月放張浚于連州

浚因星變欲力論時事以其毋計氏年高言
之必被禍計氏知之誦其父咸紹聖初制策
曰臣寧言而死於斧鉞不忍不言而負陛下
浚意遂決即上疏言當今時勢如養大蛇於


頭目心腹之間不決不止遲則禍大而難決
疾則禍輕而易治惟陛下謀之於心斷之以
獨謹察情偽豫備倉卒庶幾社稷安全不然
後將噬臍事下三省秦檜大怒令中丞何若
劾之遂貶連州居住尋徙永州檜必欲殺浚
以其死黨張柄知潭州與郡丞汪召錫共伺
察之

冬十月楊愿罷以李若谷簽書樞密院事

愿希秦檜意附下周江
至是斥去天下快之

續資治通鑑綱目卷之十四

續資治通鑑綱目卷之十四 九十三 一百六十五



Faint vertical text columns, likely bleed-through from the reverse side of the page.

Blank page with a faint rectangular border impression.

